

Pauro Korĩtio ezeƙtsa bo ziwatahakazo

Wastuhu Korĩtio ezeƙtsa Pauro ziwatahaka naha humo batu siakparawy. Iwatahi ziwatahakazo tahyrikosokdawy soho humo nisispirikpoko. Deus Pauro tuk ziknapykyrykta hi iwatsahi katsa kino niwatihi Deus soho humo tanymyryky.

1 ¹Uta Pauro, Sesus Kiristu ykzohota iwa hi Deus nizihikik. Iƙiahatsa Korĩtio ezeƙtsa bo piwataha. Asaktsa Deus tyryktsa, Akaija ezeƙtsa bo niwatihi piwataha. Asahi Sesus harere bo hyĩ nikananaha. Timoteo humo katsa mymypoƙzitsirētsa mytsy wata atahi katuk ahabo piwatahaka.

²Deus myzo Sesus Kiristu mypehakatsa iwaze sibo mopamykysokoze utakta:

— O myzo Korĩtio ezeƙtsa tsysipokzitsihikikta! Sibo tsysipywyky iwaze batu paikpa mytsaty mykaranaha sakurētsa mykaranaha — my. Iwa Deus bo ahatsyhyryze mopamykysoko.

Pauro Deus humo tsakurēta nikara.

³Katsaktsa Deus bo tihiktsa:

— O Deus myzo ikia zuba tsamysapyrēta ikia hi mypehakatsa Sesus Kiristuzo. Ikia zuba myhumo tsamypoƙzitsiukrēta, iwatahi myzo babata — tsimaha. ⁴Atahi sinini tsimykarannahaze mymytsumuēhĩ. Paikpa mytsaty tsimykarannahaze mymykuwyky. Deus hi:

— Pahatsumuēhĩ ikiahatsa niwatihi ustsá kytsa sinini mykaranahaze tsysitsumuēhĩnaha iwahi natatsihikik — iwa myhyrinymyrētsa Deus hi nimyhyrinymyryky. ⁵Kiristu mytsyhyryze sinini nikara. Katsa kino niwatihi Sesus Kiristu humo tsikspirikpokonahaze ihumo sinini tsimykarannaha. Iwatsa tu sinini tsimykarannaha zeka atahi mymykuwyky. Iwatsahi ihumo mypunihikrētsa tsimoziknaha.

⁶Tapara ahabo iktsasoko Deus nimitysumuēhĩkĩ nawa Deus mymytsapuhyripyrywyky Kiristu mysapyzekenihyrikosokda iwatsahi sinini ykarawy bo batu zikaha. Kytsa asaktsa Deus batu siakparawy mymysukyrykynaha. Mymysukyrykiknahaze Deus mymytsumuēhĩ atahi

mymykuwyky ana humo kino ahahyrinymyrëtsa. ⁷Iwaze uta ahasoho humo kaspihikrëta. Ikiahatsa hi:

— Hawa Deus kytsa mysitsumuëhikike iktsa tsimaha, iwatsahi asaktsa Deus batu siakparawy mymysukyrykynahaze Deus mymytsumuëhĩ, ihumo mypunihikrëtsa tsimoziknaha iwahi ustsá kytsa mysitsumuëhikĩ niwatihi — tsimaha.

⁸Katsaktsa Asia eze tuze hawa tsihokdaharëna imysapybara ty mybo nikara. Anahi ahabo motsasoko iwaze tsinymyrykynaha. Kytsa nimyitsapyriwykynaha. Sinini tsikykaranaha. Iwaze mypetu tsikykaranaha:

— O abahi katsa tsimyokbanahatsa watsa. ⁹Ustsá kytsa mymybanaha bo — mytsaty tsikykaranaha. Iwa mytsaty ahabyitsa tu tsikaha. Batu mypunihik. Iwaze mspihikbyitsa tu tsimykaranaha. Iwaze Deus zuba mymytsumuëhĩ ana humo hi myhyrinymyrëtsa. Ata zuba siakbatsa mynasihyrizikpowy. Iwaze sinini tsimykaranahaze batu mytsaty tsimykaranaha — O katsa mypunihikrëtsa tsimaha — iwa batu mypetu mysopyk. Ihumo zuba mypunihikrëtsa iwa Deus nimyhyrinymyryky. ¹⁰Ata pokzi hi kytsa nimybakzykynahaze nimytsumuëhikĩ iwatsahi tsikwaknaha. Iwaze katsaktsa:

— O atahi mymytsumuëhiekik iwaze ihumo mspirikporëtsa — tsimykaranaha. ¹¹Ikiahatsa niwatihi Deus bo mytsyhyryze tsimypamykysonahaktsa! Mytsyhyryze Deus bo tsimypamykysonahaze Deus mymytsumuëhikĩ. Isapyrënikia ty mybo nyny my. Myhumo tsimpokzitsiukrëta iwaze kytsa ipe:

— O myzo Pauro tuktsa humo niwatihi sihumo tysipokzitsiki, ikia zuba tsamysapyrëta — maha. Iwa kytsa sizubarëtsa Deus humo sakurëtsa maha.

Pauro ta soho humo meky watu nikara.

¹²Iwaze mypetu mysopyk katsaktsa wasani tsimykaranaha, Deus humo wasani mysopyk. Ikiahatsa humo hi tsimpokzitsiukrëtsa iwatsahi mykurëtsa. Deus humo ahabo simypokzitsirëtsa batu ahabo zuba tsikykaranaha. Deus mymytsumuëhikĩ iwatsahi wasani tsimyzurukunaha ana humo hi mykurëtsa.

¹³Iwatsahi ahabo tsiwatahakanahaze ihokdahabara ty tsikykaranaha ipiktsihibara ty zuba tsikykarana tsimyspirikponaha. Abaka iwa ape iky hỹ tozeka ja tsimyspirikpo ¹⁴Ikiahatsa sikaeni zuba mysoho humo tsinymyrynaha. Uta hi: — Aibani tsinymyrybabanahaze myhumo ahakurëtsa — iwa mozihikik. Sesus Kiristu mypehakatsa myziksizoze myhumo ahakurëtsa mywatsa ahahumo mykurëtsa.

¹⁵⁻¹⁶Niytahi utakta ahabo mytsaty ikykaraze iknakozore tsihikik Masedonia bo moparakze:

— O Masedonia bo moparakze Korītio ezektsa bo mynakozore. Myziksizoze niwatihi Korītio ezektsa bozo my. Nawa petok babaha sibo mynakozore iwatahi mysihyrinymyryze sakurētsa. Sudeja bo my zeka piktsumuēhīnaha — iwa mytsaty ikykara. ¹⁷Anasoho ty ba ziky. Ana humo hi tsipiksapybyikinaha. Ahaokze ka — O Pauro hawa sa mykara batu ihyrinymyry. Batu ispirikpo batu imysapy — tsimaha. Iwa kasoho humo mytsaty tsimykarana. ¹⁸Iwa batu ba my. Deus ba zikmyspihikbata, Deus ta wasape zuba mykara. Uta kino niwatihi batu mybarapetu kasopyk. Wasape mykara iwata wasani mykara. Deus ana humo hi tsihyrinymyrēta. Ikiyahatsa batu tyso:

— O Pauro hawa motsaso zeka wasani ja mykara — Iwa batu tyso. ¹⁹Utakta Deus wasania ty Sesus Kiristu soho ahabo iksasoko. Timoteo, Siras ahatsa katuk Sesus Kiristu Deus tse babata ziknatsasoikknaha. Hawaha isoho ty tsiktsasonaha wasani ana harere humo hi wasape my. ²⁰Deus mype:

— Hawa tisapyrēna my pahasapywyky — my. Sesus Kiristu humo hi imysapyrēna ty mybo nyny my. Katsaktsa:

— Hawa haty Deus mybo nitsasoko atsatu wasani mykara. Iharere mybo tsizubarēna. Kiristu humo zuba iharere bo yhy mynakara. Iharere baba zuba. Iwa kytsa sizubarētsa bo tsimytsasonaha. Iwatsahi kytsa hi: “O Deus tsamysapyrēta” — mykaranaha. ²¹Deus hi mymytsumuēhīekik. Katsaktsa ikiahatsa kino niwatihi Kiristu tyryktsa tsimoziknaha ana humo hi nymywatawy. ²²Mynaro mynamy humo tsiyipwatahanaha iwatsahi kytsa mynamy humo sihyrinymyrētsa. Iwatahi Deus hyrikoso mytuk mynapykyryk Deus tihi: — Asaktsa kahyrytsa — mykara. Deus hyrikoso mytuk mynapykyryk zeka iwaze usa isapyrēnikia ty mybo nyny my.

²³Deus okze ahabo motsasoko. Iokpyrykytatu batu. Ikiyahatsa bo mynakozore zeka pahabetsakak. Pahabetsakak zeka ahasukatsihikrētsa tsimoziknaha. Iwatahi batu ahabo zuk. ²⁴Ikiyahatsa botu Sesus harere bo hyhy tsimykarana. Katsaktsa batu ahapehatsitsa, tsipahatsumuēhī tsihikknaha. Sesus harere bo hyhy tsimykarana zeka ihumo ahaspirikporētsa ana humo hi tsipahatsumuēhīknaha, iwatsahi ahakurētsa tsimoziknaha.

2 ¹Iwaze kapetu kasopyk:

— Tapara Korītio ezektsa kaharere humo batu siaku iwatahi batu mysibetsakzo — iky iwatahi batu ahabo zuk. ²Kaharere humo ahasukatsihikrētsa zeka batu aty tohi pikykywyky. Ikiyahatsa pahasuka tsihikikwyky ikiahatsa zuba tsipikykywykynaha. ³Iwatahi batu ahabo zikumu papeu humo iwatahaka, kawataha papeu humo ky zahabetsakak:

— Ahamysapybyitsa tu tsikykarana tsimoewynahaktsa!
— iky. Ahabo pomoze katy sukatsihikbyri zeka ba zikumu.

Tsiykyuwykynahaktsa kytsa! Kakurēta zeka ikiahatsa kino niwatihi ahakurētsa tsimoziknaha hỹ. ⁴Ahahumo kasukatsihikrēta iwatahi papeu humo ahabo iwatahaka. Ahapokzi ikpuziuku. Ahapokzi paikpa mytsaty mykara. Anapapeu humo iwatahakaze ahasukatsihik byihuja ahaspirikpowy bete pahahyrinymyryky. Ahahumo kamypokzitsiarēta tu iwahi papeu humo iwatahaka.

Deus mymysapuhiripyrywyky.

⁵Atakta ahatuk imysapybyita ziknakara ihumo batu kaku. Wastuhu ikiahatsa tuk ihumo ahasukatsihikrētsa. Niwazubaktsa! Isoho botu ahabo iwataha hawa ipe my zeka mymybetsakak iwa botu iwataha. ⁶Kytsa sizubarētsa ahatuk zibetsakaknaha iwatahi batu zimyizo. Niwazubaktsa.

⁷Abaka imysapybara ty ziknakara naha ty tsiokzohiknaha. Tsumuēhīnahaktsa! Atahi tisukatsihikrēta zeka tsiakuwykynahaktsa kytsa! Tisukatsihikrēta tu Deus imysapybara tu ziokzohik. Ikiahatsa kino niwatihi tsokzonahaktsa anaharere humo tsimyspirikpo zeka ana ty tsumuēhīnahaktsa. Iwa zeka iaku byita mozik. ⁸Ibo tsipisapywykynahaze iwa ikiahatsa ihumo ahamypokzitsiukrētsa ana humo hi tsihyrinymyrēta. ⁹Ahabo iwatahaze — Kaharere bo hỹ tsimaha ja. Batu kanyhy — iky. Iwaze iwatahaka. Abaka kahyrinymyrēta. Iwatatuze batu ahabo kozoreze kaharere ty papeu humo iwatahaka ana humo hi tykaranaha.

¹⁰Atakta imysapybyita ziknakara ihumo batu kaku. Ikiahatsa imysapybyita tu mykara tsiokzohiknaha zeka uta kino niwatihi, imysapybara ty nikara piokzohik. Kiristu okzeka imysapybara ty piokzohik. Abaka katsa batu mysukatsihik. Wasani my. ¹¹Satanas mymysapybyiriki iwa botu mytsaty mykara, katsaktsa mysapybyitsa tu tsimykaranaha ana humo kino mymymywyky. Iwa myzihik zeka myhyrinymyrētsa iwatsahi batu yhỹ tsimaha.

Pauro Toroade eze paikpa mytsaty nikara.

¹²Toroade bo ikzumuze Deus wasania ty Sesus Kiristu soho Toroade ezektsa bo iktsasoko. Hawa maku ziskezozekba buruhuwa babatu zipoba anawaha mypehatsa Kiristu zikpeha, Deus wasania ty Toroade ezektsa bo motsaso. Anaeze Deus harere piwaby tsihikiknaha iwaze Deus wasania ty kytsa bo iktsaso. ¹³Iwa zeka paikpa mytsaty ikykara. Titu katsy wata batu tyhobyk Toroade eze. Iwaze Toroade ekze ikparak. Masedonia bo ikukuru anaeze Titu paikpa ikziberiki.

Kiristu izikwyrēnikita.

¹⁴Kytsa niwatorokonahaze aty ipaikanikita ustsas kytsa nisioktyhyryknahatsa. Isukyrytsitsa sitsipa humo nisioktyhyryknaha.

Ihudikhudikwy bo izumunahaze isukyrytsitsa iapik nisioktyhyryknaha. Sizubarētsa isukyrytsitsa bo iktsa nikaranaha. Anawahi Deus zikwy humo mypunihikrētsa tsimoziknaha, ihumo zuba katsaktsa ipaikanikita watsa tsimoziknaha. Iwatsahi kytsa sizubarētsa mybo iktsa mykaranahaze katsaktsa Kiristu tuktsa tihi h̄y ana humo hi sihyrinymyrētsa. Iwatsa nanabyitaba tsimykurunaha. Deus wasania ty tsimytsasokonaha. Wasaniha ty tsimytsasokonahaze jokmorēnikia waha my. Kytsa jokmorēnikia okmore waha iwa Deus mymypeha wasania ty jokmorēnikia waha my nanabyitaba jokmorē. Iwatsahi Deus pe:

— O Deus ikia zuba tsamysapyrēta — tsimaha.

¹⁵Tubabatu Deus wahoro zubata eze ziknapamykysokonahatsa jokmorēnikia ty zikoroko iwaze zatata tisapyrēna jobo Deus bo nido. Ana zatata waha tsizubarēna ty nu nikaranaha. Iwata katsaktsa Kiristu harere bo zuba hȳy tsimykaranaha ana bo hi kytsa sizubarētsa iktsa mykaranaha. Asaktsa simysapybyitsa nikaranaha sihumo Deus mysiokzohik mybo iktsa maha. Utsaktsa sinini ykarawy bo mykaranaha asa kino niwatihi mybo iktsa mykaranaha. Iwa sizubarētsa mybo iktsa mykaranaha.

¹⁶Simysapybyitsa sinini ykarawy bo sisapy, katsaktsa Kiristu tuktsa sihumo zatata nihyrikosokdata h̄rō wata.

Utsa simysapybyikitsa tu nikaranaha iwaze Deus mysiokzohik asa humo kino niwatihi katsa Kiristu tuktsa zatata jokmorēnikia wa iwaze mysiakuwyky. Batu aty tohi Kiristu harere kytsa bo mysihyrinymyryziuku. Atakta Deus zikwy zuba ituk motsasoziuku. ¹⁷Ata zikwy hi mytuk mynapykyk iwatsahi Deus harere tsimytsasoziukunaha. Deus mype niy:

— Wasaniha ty kytsa sizubarētsa bo tytsasokonahaktsa! Kahyrikoso ahatuk mynapykyryk iwa kaharere tsimytsasoziunaha — niy. Katsaktsa kytsa humo batu mospihikbata. Utsa kytsa okyrysaro humo zuba Deus wasania ty motsasokonaha, katsaktsa batu. Kiristu sopyk humo ma tsimykaranaha iwaze iokzeka tsimytsasokonaha mypubaraty tsimytsasoziukunaha.

Aibaky Deus harere.

3 ¹Asaktsa pahamyikinaha katsaktsa mahani siwatsabyitsa. Asahi: — Hana bo sa papeu, haneze sa iwatahaha ikiahatsa wasani ahasopyk — maha. Katsaktsa mysapyrētsa ana humo hi ahahyrinymyrētsa. Papeu mysoho batu tsimyzihihiknaha. Ikiahatsa utsa kytsa bo ty moso tsiwatahakanaha batu tsimyzihihik. ²Ikiahatsa mypapeu waha tsimaha. Kytsa iwatahaha pinymyrykynahaze iwaze anaharere humo sihyrinymyrētsa. Kytsa sizubarētsa ahabo iktsa mykaranahaze asahi:

— O Korītiō ezektsa wasani zikzurukunaha. Pauro wasani nisihyrinomyryky mahani tymyi tsimysapyrēta — maha. Iwa maha ahamysapybara tsimoewynaha ana bo hi iktsa mykaranaha ana humo hi kahyrinomyrēta.

³Ikiahatsa papeu waha tsimaha. Kiristu papeu humo ziwatahaka nahawa. Utakta karata papeu wata zikpeha zuba. Atahi iharapuksaysiksikwaka ty iwatahabara. Harahare ukpe humo iwatahabara. Deus hyrikoso ata humo hi zuba katsaktsa Kiristu sopykyryktsa tsimyzurukunaha, atahi ispitu mykara. Ata humo hi zuba tsimiharape pokzitsikinaha. Katsaktsa Deus wasania ty ahabo nitsasoko, ata humo hi zuba Sesus harere bo hỹ tsimykaranaha. Iwatsahi ahamysapyrētsa tsimoziknaha ana ty hi kytsa sizubarētsa bo karata waha ty.

⁴Deus okze mystirikporētsa. Kiristu harere bo hỹ tsimykaranahaze kino ihumo zuba mystirikporētsa tsimoziknaha, iwatsahi wasaniha tsimytsasoziukunaha. ⁵Deus myty tsumuēhī byizeka wasaniha kytsa bo ba ziktsaso. Deus zikwy humo zuba wasania ty tsimytsasokonaha. ⁶Ata hi tazikwy ty mybo nyny niy. Nanabyitaba izikwy humo Deus harere wasania ty tsimytsasoziukunaha. Mybarawy ezektsa bo sizubarētsa ityryktsa mozihikik iwatahi mynamytsumuēhīkī. Deus wasaniha iharere ezytyk my. Anaharere ty mybo nitsasoko. Anaharere humo wasani tsimykaranaha. Tsimyhyrikosokdanaha zeka iharere humo mywahi Deus tuk tsimynapykyknaha. Deus hyrikoso anaharere humo mymyhyrinomyryky. Deus harere, Moises bo nitsasoko ipehawy iwaze kytsa zuba Deus tuk tawahi ba ziknapykyknaha. Kytsa tahaharere humo wasani nizihikiknaha. Batu ba. Taha bo zuba mybarapetu mykaranaha. Tahaharere humo mohyrikosokdanahaze batu tawahi Deus tuk ziknapykyknaha. Deus wasania ty zuba mykara. Ihyrikoso mytuk ana harere mymyhyrinomyryky ana humo hi zuba mysapyrētsa tsimoziknaha.

⁷Moises Deus harere ibyky mymyhyrinomyry hawa batu mysapy tsimaha. Anaharere haraharetsa siokpeziurētsa humo ziwatahaka. Deus imysapyrēnikita tu anaharere Moises bo nitsasokoze hawa tisapyrēna natakaha. Iwatahi Isareu tsekokatsa Moises ok bo batu iktsa zikaha. Tsioksapyrēta niyze iwatsahi kytsa ibo batu iktsa zikaha. Bykyze iok karipu karipuk ityh̃wy hana bo ja niy. Katsaktsa iharere bo batu h̃y tsimykaranaha zeka tsimyhyrikosokdanahaze Deus tuk mywahi ba ziknapykyknaha. Iharere mymyhyrinomyryky katsaktsa batu mysapy tsimaha. ⁸Abaka Deus hyrikoso mytuk mynapykyryk anahi wasanikia. Ihyrikoso mytuk mynapykyk atahi isapyrēnikia. ⁹Deus harere Moises bo nitsasoze anaharere tisapyrēna. Anaharere humo hi Deus mype niy:

— O hawaha ty tsikykaranaha batu imysapy my — nikara. Myhyrikosokdanahaze Deus tuk tahawahi ba ziknapykyknaha. Deus okzeka batu mysapy anaharere humo hi tisapyrēna. Abaka Deus harere

ezytyk, wasania ty aba zubaha anaharere bo yh̄y tsimykarana zeka Deus okzeka mysapyrētsa tsmoziknaha. ¹⁰Tapara Deus harere Moises bo nitsasokoze tisapyrēna bo iktsa niy. Abaka Deus harere ezytyk wasania ty anaharere hi aba zuba tisapyrēnikia ty. Hawa anaharere mymyhyrinymyrykynahaze Deus okzeka mysapyrētsa tsmoziknaha iwaze anaharere ezytyk isapyrēnikia ty my. ¹¹Iharere taparaka tisapyrēna. Deus tihi:

— Anaharere humo yh̄y spyk tsimykarana anahi mozihikik. Bykyze kaharere ezytyk motsasoko anatyhi ahawahi yh̄y tsimykarana haktsa kytsa! — niy. Deus wasania ty zuba isapyhababa motsasoko.

¹²Iwaze katsakta mywahi Deus tuk tsinapykyryknaha ana hi taperyky. Deus mymysapywyikik ana humo hi myhyrinymyrētsa. Iwatsahi batu mysikpyby, batu ba Deus wasania ty kytsa sizubarētsa bo tsmyzihikiknaha. ¹³Katsakta batu Moises watsa. Atahi panu ty taty hasasuk ziknakara. Isareu ezektsa iok karipu karipuk humo ky ityh̄wytsa hana bo ja iwatsahi ibo batu iktsa niaha.

¹⁴Isareu ezektsa Moises sopykwy tsikaeni zuba zinymyrykynaha. Deus harere humo tsikaeni zuba sihyrinymy. Maku wata atakta panu ty taty hasasuk niy. Abaka atsatu. Deus harere sihumo tsihokdaharēna iwatuze iharere taparaka zinymyryikiknaha anaharere humo batu sihyrinymyry. Kiristu zuba mysitsumuēh̄i iwaze asahi iharere bo hȳy mykarana zeka anaharere mypubara ty pinymyrybanaha. ¹⁵Abaka Moises sopykwy pinymyrynahaze tsikaeni zuba sihyrinymyrētsa asahi maku watsa panu ty taty hasasuk hasasuk sisopyk. ¹⁶Aty zeka:

— Sesus mypehakatsa harere bo hȳy tsimykara kyze Deus harere ty tsinymyrybaba. Deus papeu humo: “Deus panu ty Moises harek humo ky zihaktahik” — niy. Isareu ezektsa niwatihi Deus harere bo yh̄y maha zeka Deus sipanu waha pihaktahik iwa iharere ty pinymyrybabanaha. Katsakta mysapybyitsa tu tsikykarana Deus mymyokzohik. Kyze amy ty panu waha ty hasasuk ty Deus pihaktahik iwaze ihumo myspirikporētsa tsmoziknaha.

¹⁷Ana waha mypehakatsa Deus hyrikoso kino niwatihi atsatu maha. Ata humo hi meky watu tsmoziknaha iwatsahi Deus tuk mywahi tsimynapykyryknaha. Iharere humo ahapybybyihu ja! Deus okzeka ihumo mysapyrētsa tsmoziknaha. Wasani tsimykarana Deus wasaniha humo meky watu tsmoziknaha.

¹⁸Katsakta botu Sesus mypehakatsa harere bo hȳy tsimykarana. Katsakta batu kytsa watsa asakta panu ty taharek nasihareksukuknaha. Batu ba. Mypehakatsa hyrikoso humo mysapyrētsa tsmoziknaha. Sesus wata tsmoziknaha. Katsakta moknywy watsa tsmaha. Kytsa mybo iktsa mahaze Sesus mypehakatsa hyrikoso mytuk pinyknaha moknywy wata. Iwatsahi mysapyrētsa tsmoziknaha pibytuhukutu Sesus wata mysapytohitsa tsmoziknaha.

Deus isapyrēnikia ty mybo nyny my.

4 ¹Deus mymysapywyky iwaze tarabaja humo nimypeha. Tubabatu mype niy:

— Nanabyitaba wasania ty myzubarētsa bo paikpa tynatsasokonahaktsa — niy. Iwatsahi mykurētsa. Mytarabajawy humo ba mykubyri zikzumu. ²Hawa batu mysapy kytsa papatu tsipireknaha. Hawa tsimyzurukunaha wasani tsimykaranaha iwatsahi batu mysikypyby. Deus okzeka wasani tsimykaranaha ana humo hi kytsa sihyrinymyrētsa. Hawa batu imysapy tserekbaiknaha. Katsa ba ziksispihikbatanaha, Deus harere humo batu mysimi. Wasaniha ty zuba tsimykaranaha. Deus harere mypubara ty zuba tsimytsasoziukunaha iwaze kytsa mysoho motsasonaha:

— O asaktsa wasani motsasokonaha siharere wasape — mykaranaha.

³Katsa Deus wasaniha humo tsiktsasoikiknaha. Anaharere kytsa bo tsihokdaharēna zeka asaktsa sinini ykarawy bo maha, sihumo hi myharere tsihokdaharēna. ⁴Asaktsa Satanas hyrikoso sapybara pehatsa sibo mybarapetu mykara. Atakta mybarawy ezektsa Deus wata isopyk mozihikik. Ihumo hi imysapybyikia bo zuba mytsaty mykaranaha. Asahi sihyrizikubyitsa watsa. Unata pyrik mykaranahatsa watsa. Deus wasania ty okoro eze kywa. Hawa mozurukunaha sihyrinymyrētsa batu pyik pyik zikaha. Kiristu imysapyrēnikita myhyrinymyrētsa. Deus wasania ty ana ty hi nimyhyrinymyryky. Kiristu Deus wata, wasaniha humo myhyrinymyrētsa. Asaktsa sinini ykarawy bo maha ana humo hi batu sihyrinymyry. Deus wasaniha humo batu sihyrinymyry. Sesus harere bo h̄ybyri nikaranaha iwatsahi batu sispirikpo. ⁵Katsaktsa mypetu ba zikaha:

— O myharere bo h̄ȳ tsimahaktsa! — iwa ba zikaha. Katsa hi:

— O Sesus Kiristu harere bo zuba h̄ȳ tsimahaktsa kytsa! Ipe: “Ikiahi aba zubata” tsimahaktsa! Iwa pykyhytutaha iharere humo zuba h̄ȳ tsimykaranaha — tsimaha. Katsa ja. Kiristu mymysapywykik iwatsahi ihumo tsipahatsumuēh̄inaha. Ipokzi ahatsyhyryze tarabajaziu tsimykaranaha. Iwa h̄ȳ.

⁶Isuknihyize iwororo babyize Deus tihi:

— Okoro tu zik — niy. Atsoko okoro yzik niy. Atahi okoroze tu waha isapyrēnikia ty mybo piwatawy. Mymyhyrinymyry. — Kamysapyrēnikita. Kapunihikrēta — anatyhi mymyhyrinymyryky. Kiristu iwata, imysapyrēnikita Deus wata, iwaze isoho humo tsinymyrykynaha. Kiristu humo tsinymyrykynaha iwatsahi Deus humo niwatihi tsinymyrykynaha.

⁷Katsaktsa Deus wasania ty tsiktsasoikiknaha. Deus pokzitsihity. Katsa mypunihikbyitsa tu Deus zikwy mytuk mynapykyryk, iwatsahi izikwy humo zuba wasania ty tsimynatsasoikiknaha. Katsaktsa morosuk

watsa. Morosuk batu isapy batu ihudi iwatahi myboboro iwatatu amy ty ipokzitsiaty morosuk eze pok pok tsimaha. Deus iwatu nimysukni iwatahi kytsa myharere ty piwabykynahaze:

— O asaktsa batu sipunihik iwa motsasokonahaze Deus zikwy humo zuba hỹ — mykaranaha.

⁸Kytsa mymyknikinahaze Sesus mymytsumuēhī. Paikpa mytsaty tsimykarannahaze Sesus humo tsimyspirikpokonaha.

⁹Mysukyrytsitsa sizubarētsa. Myharereziuwyttsa kino niwatihi sizubarētsa. Mysukyrytsitsa mymysukyryikiknaha iwatsatu Deus ba zikmyrek.

¹⁰Pibiyituhukutu mysukyrytsitsa mymyba tsihikiknaha iwaze katsaktsa:

— Sesus sukyrytsitsa zibezenaha anawahi mymybanaha — tsimaha. Sesus izikwy hi mytuk mynapykyk ana kino kytsa sizubarētsa mymysatykynaha.

¹¹Kytsa Sesus harere bo batu hỹ mykaranaha asaktsa mymyba tsihikiknahaze Deus mype:

— Ahasukyrytsitsa pahamyitsapyriwykynaha zeka kahyrikoso ahaturk mynapykyryk ihumo ahapunihikrētsa tsimoziknaha — niy. Iwatsahi kytsa sizubarētsa hi:

— O asaktsa Deus zikwy humo zuba sipunihikrētsa, ihyrikoso situk mynapykyryk — mykaranaha.

¹²Sesus Kiristu harere tsimytsasokonahaze asaktsa Sesus harere bo yhỹ ahabyitsa tu mymyba tsihikiknaha. Ikiahatsa myharere bo yhỹ tsimykarannahaze hỹ iwaze tsimyhyrikosokdanaha zeka Deus tuk ahawahi tsinapykyknaha. Katsa sinini tsimykarannahaze iwatsahi ikiahatsa Deus tuk ahawahi tsinapykyryknaha.

¹³Tubabatu Deus harere papeu humo ziwataha:

— Deus harere humo hyỹ ikykara iwatahi iharere soho iktsasoko — niy. Katsa niwatihi Deus harere bo hyỹ tsimykarannahaze iwatsahi iharere kytsa bo tsimytsasokonaha. ¹⁴Sesus Kiristu nihyrikosokdaze Deus hi zihyryzikpowy. Katsa niwatihi tsimyhyrikosokdanaha zeka Deus mynamyhyryzikpowy Kiristu wata. Katsaktsa ituk mywahi tsimynapykyknaha. Ikiahatsa kino niwatihi ituk ahawahi tsimynapykyknaha. Deus bo mymyoktyhyryk anaeze mywahi tsimynapykyknaha hỹ. Ana humo hi myhyrynymyrētsa tuze Deus wasania ty tsimytsasoikiknaha.

¹⁵Katsaktsa Deus harere ahabo tsiktsasokonahaze sinini tsikykarannahaze. Ana bo hi iktsa tsikykarannahaze. Iwatsahi Deus pahasapywyky iwatsahi sizubarētsa ahaturk Deus tyryktsa moziknaha. Iwaze kytsa sizubarētsa Deus bo nipamykysokonaha:

— O Deus myzo ikia zuba amysapyrēnikita. Mybo tsipisapywyky iwatsahi katsaktsa ahumo ka mykurētsa — tsimykarannahaze. Iwaze kytsa sizubarētsa Deus zuba imysapyrēnikita sihyrynymyrētsa hỹ.

Sesus humo sispirikporêtsa.

¹⁶Iwatsahi batu mysukatsihik. Mynury humo batu mypaik tsimytsaikbanaha katsakta mypunihikrêtsa tsimoziknaha hỹ. Deus hyrikoso mytukze iwaze Sesus harere humo zuba tsimyspirikpokonaha. Myzibytuhukutu izikwy humo meky watu tsimoziknaha.

¹⁷Asakta Sesus harere bo yhỹ ahabyitsa mymykniknaha. Pahamyitsapyriwykynaha aibani simysapybyitsa tu nikaranaha nepyknaha. Ana humo hi sininisyk tynakaranaha. Bykyzehu Deus mybo pisapywyky. Katsakta iwa tsimoziknaha mysapyrêtsa hỹ. Niwazubakta! Ana kino tawahi tsimynapykyknaha hỹ. ¹⁸Iwatsahi hawa ha ty iktsaziu tsimykaranaha ana soho bo mytsaty mytsaty byitaha. Aibani mynapyk mopyk naha bo ka mytsaty mytsaty byitaha. Zikozonahabara bo hi mytsaty tsimykaranaha. Hawa Deus tuk mywahi tsimynapykyryknaha ana soho humo hi mytsaty tsimykaranaha. Amy bo iktsa tsimykaranaha bykyze hana bo ja. Amy bo batu iktsa tsimaha atsatu tawahi mynapykyk. Iwa hỹ.

5 ¹Mynury myparik waha. Kaparik eze mopykyryksyky bykyze mopykbaik iwahatu aba zuba atatu tsimaha, bykyze tsimhyrikosokdanahaze mynury mobibiba. Tsimhyrikosokdanahaze mynury wytyk eze tu motare. Deus hi ustsá nury ezytyk mysisukni mytsyhyryze pikymy. Bijoikpe eze mynury ezytyk mozokni anaka mywahoro waha tahawahi mynapykyknaha.

²Abaka mynury ezytyk humo botu myhyrizikbarêtsa. Iwatsahi mynury bijoikpe eze tu taperyky. Ana hi tsimyzihikiknaha. ³Anaeze bijoikpe eze tu mysuk wa tsimynapykyknaha. Mynury ezytyk mysuk wata maha. ⁴Katsakta mybarawy Ezektsa sinini tsimykaranaha. Mytsapyrêtsa tsimaha. Kytsa tahaparik eze tu watsa, katsakta mynury eze tu tsimaha. Myhyrikosokdabyize mynury ezytyk zuba tsimyzihikiknaha hỹ. Deus mynury ezytyk ty mybo nyny myze mywahi ituk tsimynapykyknaha, ba zikyrikosokdazonaha iwa tsimyzurukunaha.

⁵Deus hi mekywaha botu mymysapy naha humo hi nimysukni, ihyrikoso mytuk mynapykyryk ana kino mozihikik. Iwaze Deus usa nury ezytyk myhumo mokymy mytuk mynapykyryk ana hi tsipinymyrykynaha.

⁶Iwatsahi mypunihikrêtsa. Mybarawy eze tuze mynury tuk mypehatsa metutu tsimaha. Aibani zuba mywahi ituk tsinapykyryknaha ana humo hi mykurêtsa.

⁷Iharere bo hyỹ tsimykaranaha iwatsahi ana hi taperyky. Ana humo hi batu iktsa tsimaha iharere bo hyỹ tsimykaranaha zuba. Sesus sopyk ty tsimyzurukunaha iwatsahi ihumo myspirikporêtsa tsimoziknaha.

⁸Iwatsahi mykurêtsa. Hawa ituk mywahi tsinapykyknaha mytsaty

tsimykarana haze hi mykurētsa. Iwatsahi mynury tahaerek tsihikik.

⁹Amy ty aba zuba ha Sesus myhumo tsakurēta mozik. Katsakta mynury suk eze tu myhumo tsakurēta tsimyzihihiknaha. Katsakta ituk mywahi tsinapykyknahaze myhumo tsakurēta mozik, iwa tsimyzihihiknaha.

¹⁰Myzubarētsa Kiristu okeryk tsinamykahanaha. Hawa tsikykarana ha humo motsaso. Kiristu simysapyrētsa pe my: — Ikiahatsa mybarawy eze tuze tsikzisapykynaha hỹ. Iwaze isapyrēnikia ty ahahuak ty ahabo nyny — my. Kyze simysapybyitsa pe:

— Ikiahatsa mybarawy eze tuze ahamysapybyitsa tsikykarana ha. Iwa imysapybyiha ty ahabo ahahuak ty nyny my pahasininiwyky — my. Iwa hỹ.

Hawa Deus harereziuwytša tsmoziknaha.

¹¹Kyze mypehatsa Sesus Kiristu tsazuba nakarata humo myhyrinymyrētsa, ihumo ma tsimykarana ha zuba, ipokzi batu mysukatsihik. Atahi myhuak ty mybo nyny my mytsaty tsimykarana ha. Iwahatu itsyhyryze tarabajaziu tsimykarana ha. Deus wasania ty Sesus soho tsimytsasokonaha iwaze kytsa iharere bo hỹ mykarana ha. Tsimytsasokonahaze wasape mysopyk, wasaniha zuba kytsa mysihyrinymyrykynaha, Deus ana humo kino zinymyry. Ikiahatsa myhumo tsinymyrybabanaha. ¹²Ikiahatsa mysoho humo batu mymybetesazo. Ahape batu tysozo. — Katsa tsipahasapywykynaha iwatsahi mybo hỹ tsimykarana haktša! — my. Iwa batu tyso. Ikiahatsa myhumo ahakurētsa ana hi tsimyzihihiknaha. Wastuhu kytsa ahabo zumunaha asakta mymysapybyrikinahatsitsa. Siokzeka simysapyrētsa watsa maha amy ty ape bo zuba iktsa sisopyk. Asakta mektsatu maha batu sisopyksapy. Hawa tsimyzurukunaha wasani my, ana soho humo hi tsimymybetesana ha.

¹³Tozeka ja katsakta ahaokze ka mytyrykmyitsa watsa. Katsakta Sesus pokzi tarabajaziu tsikykarana ha ana humo hi ahaokze ka mytyrykmyitsa mytsaty tsimykarana ha. Zimyinahabyitsa tu zeka tsipahatsumuēhīnaha ana humo hi tsimyzurukunaha ana kino tsipinymyrykynaha iwaze ahatsyhyryze tarabajaziu tsimykarana ha. ¹⁴Kiristu myhumo tsimypokzitsiarēta. Anaty kino kytsa sizubarētsa tsysitsumuēhīnaha. Mytsatziyu tsimaha zeka maku estuba zuba mybarawy eze ktsa sapyzky nihyrikosokda. Iwatsahi mybarawy eze ktsa Sesus tuk tsimyhyrikosokdanaha. ¹⁵Mysapyzky nihyrikosokda iwatsahi hawa ha tsimyzihihiknaha batu hỹ tsimykarana haze. Niwazuba mysapyzky nihyrikosokda iwatsahi ana hi mozihikik ana bo hi hỹ tsimykarana ha. Atahi mysapyzky inahyrizikpo iwatahi ana hi mozihikik ana bo hi hỹ tsimykarana ha iwa tsimyzurukunaha.

¹⁶Abaka mybarawy eze ktsa watsa batu mytsaty tsimykarana ha. Mypetu mysopyk:

— O atakta tsimysapyrêta wata — tsimaha.

— O ustakta imysapybyita wata my — iwa mytsaty byitaha! Tapara Kiristu soho nawa mytsaty tsikykaranaaha abaka batu. Tsiziakbatanaaha zuba zeka Kiristu mymyhyrinymyryky. Sesus Kiristu humo myspirikporêtsa tuze kytsa ezytyk watsa tsmoziknaha.

¹⁷Kiristu tuk tsinapykyknahaze meky watu tsmoziknaha. Deus mymysuknizo tawa iwatsahi ihumo meky watu tsmoziknaha. Hawa tapara tsikzurukunaha batu imysapy abaka mahani. Iwaha hi nepykbai katsa meky watu tsmoziknaha. ¹⁸Iwatsahi meky watu tsikyziknaha. Deus humo zuba katsa meky watu tsmoziknaha, Deus hi nimysuknizo Kiristu mysapyzekenihyrikosokda naha humo katsakta meky watu tsmoziknaha. Tubabatu katsakta Deus humo batu mykparawy taparaka ihumo tsikmykyrikinaha. Abaka mahani. Ata humo hi abaka ahaharereziuwyt tsmoziknaha iwaze Deus mype niy:

— Utsa kytsa boktsa! — tsimaha. — Kytsa bo tsimytsasonaha kahumo hi kaharereziuwyt moziknaha, ahaokani byihuja tsimaha — Deus niy.

¹⁹Kytsa sizubarêtsa simysapybyitsa ty nikaranaaha ana soho Deus bo ka batu mytsaty nikara. Kytsa simysapybyitsa ty nikaranaaha Kiristu sisapyzekenihyrikosokda. Kiristu nihyrikosokdaze simysapybyitsa tu nikaranaaha sihuak ziaксе. Iwatsahi ispe tsimaha:

— Sesus harere humo hyÿ tsimykaranaaha zeka Deus harereziuwyt tsmoziknaha. Kiristu ahasapyzekenihyrikosokda iwaze Deus ahamysapybyitsa tsikykaranaaha ihumo zahaokzo — tsimaha. Sesus Kiristu mypehakatsa, iwatsahi iharere kytsa bo tsimytsasonaha.

²⁰Iwatsahi Deus ykzohotsa tsimaha. Deus harere zuba ahabo tsimytsasonaha. Katsa hi:

— Deus harereziuwyt tsmoziknaha ana hi mozihihikik. Deus myzo ahasopyktsa — tsimaha. Deus hi mybarawy eze tu zeka atsatu ahabo motsasoko, katsakta iakzohotsa tsimaha.

²¹Kiristu batu imyi ana humo hi ahahyrynimyrêtsa. Katsa mysapybara ty ana hi Kiristu ziaкsehyryk niy. Nihyrikosokdaze mysapybara huak ty ziaкse niy. Iwaze mysapybyitsa ty tsikykaranaaha Deus mymyokzohik abaka hana bo ja. Iwatsahi katsakta Kiristu tuk tsimyzurukunaha zeka isopyk watu tsimykaranaaha iwatsahi Deus okzeka mysapyrêtsa tsmoziknaha. Katsa meky watu tsmoziknaha. Iwa hÿ.

6 ¹Kyze katsakta Deus tuk tarabajaziu tsimykaranaaha iwaze mypehawyt hi:

— Tapara Deus zahasapywyky, isapyrênikia ty ahabo nyny niy ana humo kino ahaspiriktsokdaha byihuja! Deus harere bo hyÿ tahaktsa iwatsahi isapyrênikia ty arek arek byitaha ja! — tsikaha. ²Deus harere tsiwabytoktonaha! Deus hi:

— Zahasapywy tsihihikize amy kabo tsikzapykyknaha botu iwaby.

Ikiāhatsa kabo ahasapybyitsa tsikykarānaha
katse humo pahaokzohik.

Iwa zahatsumuēhī tsihikik — niy.

Abaka Deus pahasapywy tsihikik, abaka pahatsumuēhī tsihikik.

³Wasani tsimyzurukunaha iwatsahi kytsa Sesus harere bo hỹ mozihikiknaha. Hawa batu imysapy tsimykarānaha zeka kytsa tihi:

— O Deus tsumuēhītsitsa batu wasani mykarānaha iwatsahi katsaktsa Sesus harere bo batu h̃y zikaha — mykarānaha. Nawa kytsa mysoho ba ziktsasonaha, batu zikaha, wasani tsimykarānaha.

⁴Katsa hi Deus tsumuēhītsitsa tsimaha, ana kino ustsā bo tawatawykynaha. Asaktsa Sesus harere bo hỹ ahabyitsa tu mymyknikinaha. Katsaktsa sihumo mykubyrisorokrētsa.

Mymysukyryikiknaha, mykubyryitywy kino niwatihi iwatsa tu mykubyrisorokrētsa. ⁵Asahi nimykinaha nymyhuruknaha. Katsa tsiknazuzuknahaze nymysapybyrikinaha. Nymyhudizukunaha. Deus humo tsizubarēna ty tarabaja ba zikpyk, myrapa tsiykyknaha, mytutsa tsiykyknaha iwa tsikzurukunaha.

⁶Iwaze ustsā kytsa mysoho zinymyrykynaha. Katsaktsa Deus tsumuēhītsitsa sihyrinymyrētsa. Wasani tsimyzurukunaha ana humo hi katsa Deus tsumuēhītsa zinymyrykynaha. Mysapyrētsa.

Deus harere humo myhyrinymyrētsa iwatsahi iharere tsimytsasoziukunaha. Mykubyrisorokrētsa. Mysopykziurētsa. Deus hyrikoso mytuk mynapykyryk iwatsahi kytsa tsiksisapywykynaha. Tsiksipehapokzitsikinaha. ⁷Deus harere zuba tsimytsasoziukunaha, Deus zikwy mytuk mynapykyryk. Wasani tsimyzurukunahatsa hi ana humo mybototsa watsa tsimaha. Mybototsa ty papyk papyk tsimaha mymybetesawy naha ziktsa watsa namybetesakanaha. Kytsa Sesus bo hỹ ahabyitsa tu myhumo natahakyrikinaha. Mysapyrētsa tu Deus hyrikoso humo iwaze batu myharerewabymybara batu zikaha. ⁸Wastuhu kytsa mysoho humo siharereziurētsa. Ustsaktsa batu, mysoho humo batu siharereziu mymysapybyrikinaha. Mektsatu kytsa tihi:

— O Pauro tuktsa simysapyrētsa — maha. Ustsā:

— O Pauro tuktsa batu mykparawy — maha. Iwa my. Katsaktsa wasani tsimykarānahaze batu isty myi, amy ty wasanikia ty zuba tsimytsasokonaha. Iwaze kytsa mysoho — asaktsa sispihikbataktsa — maha. ⁹Kytsa nyhybyitsa watsa sisopyk. Ustsaktsa mynyhytsa tihi h̃y maha. Wastuhu kytsa:

— Pauro tuktsa botu niakbabanaha — maha. Katsaktsa myspitu tsimaha. Kytsa mymyzuhunahaze ba zikmybanaha.

¹⁰Kytsa ziknamykubyikinaha iwatsatu Deus humo mykurētsa tsimynapykyknaha. Kytsa tihi — asaktsa sinamybyitsa — maha. Katsaktsa Deus wasania ty tsimytsasokonahaze isapyrēnikia ty kytsa

bo nyny tsimykaranaha, ikiahatsa niwatihiktsa ana harere humo hi sinamyrētsa watsa moziknaha. Kytsa okzeka mynamybyitsa watsa iwatsatu Deus okze mynamyrētsa watsa imysapyrēnikia ty mybo nyny niy.

¹¹— O Korītio ezecksa myharereziuwysitsa ahamumo tsimypokzitsiukrētsa. Myharere ahabo batu iokdaha myharere mypubara. Hawa mytsaty tsimykaranaha ana kino ahabo tsimytsasokonaha ikiahatsa mykparawytsa. ¹²Tsipahasapywykynaha ana hi tsimyzihikiknaha. Ikiahatsa ja. Myhumo h̄ybyri tsimykaranaha. ¹³Ahabo tsimytsasokonahaze myhyrytsa pe maha wa tsinakaranaha. Ikiahatsa mybo aha humo kyty tsiwatawynaha. Myhumo ahakryribyihu ja — tsimaha.

Pauro Korītio ezecksa bo nisisukpe.

¹⁴Ikiahatsa kytsa Sesus harere bo hȳ ahabyitsa tu ka p̄o p̄o byitaha. Kytsa simysapybyitsa mykaranahatsa ba situk mynapykyknaha. Aty zeka okoroze pitabaka taske humo tsihyrynymyrēta. Aty zeka unata eze pitabaka pyrik pyrik mykara iwatsahi ituktsa batu zikaha. Asaktsa ahatusabyitsa. Iwatatu ikiahatsa Sesus tuktsa Sesus harere bo hȳ zikahabyitsa tu ba situk tsinapykyryknaha. Batu ahamykpyriziu.

¹⁵Kiristu Satanas ahatsa batu harape tuk zikaha. Iwatsa Sesus tuktsa Satanas tuktsa meky watu maha. Hawa Sesus tuktsa mytsaty mykaranaha hawa Satanas tuktsa mytsaty mykaranaha meky watu mykaranaha. Batu atsatu mytsaty zikaha. Iwatsahi batu simykyriziu. Iwa h̄y. ¹⁶Deus wahoro zubata deusbyitsa wahoro mekywaha tu maha. Katsaktsa Sesus harere bo hȳ tsimykaranahaze Deus wahoro wata tsimaha. Deus hyrikoso mytuk mynapykyryk iwaze Deus hi:

— Utakta situk mynapykyryk. Kape: “O Deus ikia zuba myzo” maha.

Ikiahatsa hi katyryktsa ispe my — niy.

¹⁷Iwatsahi mypehatsa tihi niy:

— Sispirikpobyitsa ty ka arekiktahaktsa!

Hawa mysopyksapy byizeka tahaerekiknahaktsa!

Imysapybara tsiperekiknaha zeka kabo pahaoktyhyryk h̄y.

¹⁸Utahi ahazo mozik.

Ikiahatsa kahyrytsa tsimoziknaha.

Kahyrytsa kahyryza ahape my — niy.

Iwa Deus nikara atahi izikwyrēnikita my ba hawa tohi zikzukninaha.

7 ¹— O myharereziuwysitsa ahamumo kamypokzitsiarēta. Deus mymysapywyky isapyrēnikia mybo pinyny tsihikik my ana tyhi Deus mybo motsasoko. Iwatsahi hawa ha ty mysapybyitsa tsimykaranaha ty ka tymoewytahaktsa! Isopyksapybara humo mytsaty mytsaty byitaha! Iwa tsimykaranaha zeka Deus hi mysapyrētsa mymysukni. Iwaze hawa

ha ty Deus batu iakparawy ipokzi batu tsimykaranaha. Iwaze isoho zuba mytsaty tsimykaranaha — my.

Pauro tsakurēta mopykyryk.

²O kytsa myhumo ahamypokzitsihuktsa! Katsaktsa tsipahapokzitsikinaha hỹ. Katsaktsa batu aty tohi tymyi. Katsaktsa batu aty tohi humo myharerewabytsihik. Katsaktsa ahatukze batu mybarapetu aha. Mynamy humo zuba batu mybarapetu tsikykaranaha, aha humo wasani mysopyk.

³Ana tyhi batu tyso iwaha ty ahamysapybyi humo. — O ikiahatsa kaokzeka batu ahamysapy — my. Ana ty hi batu mysopyk. Botu ahabo iktsaso hawa ahahumo mypokzitsirētsa, mywahi ahahumo mypokzitsirētsa tsimaha. Abaka ahahumo mypokzitsirētsa, tsimyhyrikosokdanahaze kino iwa hỹ ahahumo mypokzitsirētsa. ⁴Utakta ahahumo kakurēta mspihikbatabyitsa tu tsimaha. Utsa kytsa bo pahaharereziuwiky. Kytsa mymysininiwykynahaze ahasoho bo mytsaty tsimykaranaha, iwaze tsimyziakuwynaha. Ahahumo hi kakurēta.

⁵Masedonia bo tsikzumunahaze batu myty byry. Kytsa sizubarētsa nahape myijakanaha ana soho meky watu tsihokdaharēna. Mypybyrētsa tsikykaranaha. ⁶Deus siakubyitsa mysiakuwyky mozihikik iwa mybo niy. Titu zumuze Deus ihumo mymykuwyky. ⁷Zumuze atahi:

— O Korītio ezektsa kahumo simypokzitsiukrētsa hỹ. “O Pauro humo katsa myhyrizikbarētsa mybo mynakozone tawata” nikaranaha. Atakta imysapybara ty nikara, isoho humo batu siaku, ihumo sisukatsihikrētsa mykaranaha “O Pauro pehawy wasani” nikaranaha — niy. Iwa Titu mybo nipamykysoko. Hawa Korītio ezektsa pikbetesa tsihikiknaha iwatahi kakurēta babata mopykyryk. Iwa Deus nimykuwyky.

⁸Iwaze kapapeu humo zahabetsakak ahaku byitsa tu tsikyppykynahatsa tu iwaze ahasukatsihikrētsa tsikaha. Ana kino ziwatahaka wasani niy. Kapapeu humo batu ahaku wasani niy. Tapara kapetu ikykara:

— Anapapeu iwatahaka Korītio ezektsa iksibetsakak wasani ja — iwa kapetu kasopyk. ⁹Kawatahaha humo ahasukatsihikrētsa ana humo hi wasani my. Kawatahaha tsinymyrynahaze ahamysapybyitsa tsikykaranaha tsmoewy tsihikiknaha ana humo hi kakurēta. Deus hi zahaokzohik ahamysapybyitsa tsikykaranaha humo batu ahaku tsikyziknaha abaka ahamysapybyitsa tsimykaranaha. Tsmoewybaiknaha. Iwatahi kawatahaha ty ahabo ikzinynyre wasani, abaka kaharere humo batu ahamyi iwatahi ahasapywyky.

¹⁰Jokboha ahakubyitsa tu tsikykaranaha iwatsahi mysapybyitsa tsikykaranaha tamoewybaik, iwaze Deus zikwy humo meky watu tsmoziknaha. Ahasapyrētsa tsmoziknaha. Ahakurētsa. Asaktsa Deus

humo batu siakparawy asahi pisuka tsihiknaha zeka simysapybyitsa nikaranaha ba ziksimoewynaha. Myhyrikosokdanahaze Deus tuk ba tahawahi ziknapykyryknaha asaktsa sinini ykarawy bo maha.

¹¹Ahasukatsihikrētsa tsikykaranaha. Ahakubyrize Deus isapyrēnikia ty ahabo nyny niy. Ana bohi mytsaty tahaktsa kytsa! Iwatsahi kytsa wasani tsimoziknaha. Mybo batu ahaharere ty harapubetehe tsikykaranaha. Kawatahaha humo nepykba tsinymyrykynahaze tsikpybynaha! Atakta ahatuk imysapybyita tu nikara ihumo tsikahakyrikinaha iwaze ikiahatsa ipe: nabo pāoty tsikaha. Iwaze ahatuk zuba tsikpamykysokonaha:

— Hawa ja tsikykaranaha wasani ja. Tybyi zuba tsimaha ja. Pauro mytuk tsimyzihikiknaha iwa mymytsumuēhī — tsimykaranaha. Hawa tsikykaranaha wasani. Kytsa sizubarētsa ahasoho humo sispirikporētsa maha nikaranaha.

¹²Iwatahi tubabatu ahabo iwatahaka. Atakta ahatuk imysapybyita tu nikara awatu mahakta iwa ahabo ity wataha. Atakta sinini niyze zikyrinymyryky ana humo hi ahabo batu ity wataha. Deus okzeka kaharere bo hȳ tsimykaranaha, kytsa bo mypubara ty mykaranaha ana hi iwatahaka hawa myhumo ahamypokzitsirētsa, ana humo hi ahabo iwatahaka ana hi tsinymyrynaha. ¹³Iwatsahi katsa mykurētsa h̄y.

Abaka myhyrinymyrētsa. Ikiahatsa myhumo tsimypokzitsirētsa ana hi tsinymyrykynaha. Titu mybo zumuze atahi:

— O Korītiō ezektsa zikpokzitsikinaha — niy. Wasaniha humo mykurētsa. ¹⁴Tubabatu Titu ahabo asiba niparakze uta ipe iky:

— O Korītiō ezektsa simysapyrētsa ahumo wasani maha papokzitsikinaha h̄y — iky. Kaharere wasani my. Ihumo tsimypokzitsikinaha ahasoho pe batu mybarapetu ikykara. Iwa ha ty wasani tsikykaranaha. ¹⁵Titu hi:

— O Korītiō ezektsa kaharere bo hȳ nikaranaha. Ziktsumuēhīkīnaha kahumo simyharerewabyrētsa — niy. Iwatahi ahahumo tsimypokzitsiarēta. ¹⁶— O kytsa ahahumo kakurēta h̄y, hawa tsimytsasokonaha atsatu tsimykaranaha iwaze ahahumo kakurēta h̄y — my.

Sesus tuktsa simykubiyihurētsa niyziknaha.

8 ¹O katukytsa Masedonia ezektsa asaktsa izumubanahaze Deus harere piwabynaha Deus nisisapywyky iwatsahi simykubiyihurētsa niyziknaha, ana soho hi tsinymyrynahaktsa. ²Sinini nikaranaha. Sinamybyitsa nikaranaha. Iwatsatu ustsā sinamybyitsa bo nynytohi nikaranaha. Sibō nyny nikaranahaze sakurētsa. ³Ana humo hi kahyrinymyrēta. Ustsā kytsa bo zibiakaknaha. Uta batu isty peha nyny mykaranaha asa tu nyny nikaranaha. ⁴Asahi:

— O mynamy ty myokyrysaro ty iwa ahabo nyny tsimykaranaha. Sudeja ezektsa Sesus harere bo hȳ mykaranaha asa bo hi nyny

tsimykarana. Myokyrysaro ty mytsyhyryze wabehyryk tsimaha — nikarana. Iwa tsizubarēna nitsasokonaha. ⁵Katsaktsa mypetu mysopyk:

— O asaktsa tsikaeni zuba nyny mykaranaha — mytsaty ahabyitsa tsikykarana. Tszizubarēna nyny nikarana. Taparaka tawaha ty Deus bo nyny niaha iharere bo zuba hỹ nizihikiknaha, iwaze myharere bo kino niwatihi hỹ nikarana. ⁶Ana ty kino katsaktsa Titu pe:

— O Korītio bo tynakozorekta — tsikaha. Titu zahatsumuēhī. Ahape niy:

— Ahaokyrysaro ty sinamybyitsa bo nyny tahaktsa! Iwa tsipisapywykynaha — niy. — Iwaze Korītio ezektsa bo tsimy. Tsiakuwykyktsa — iky. Hỹ niy.

⁷Ikihatsa ahanamyrētsa watsa tsinakarana. Sesus humo ahaspirikporētsa h̃y. Deus wasania ty tsimytsasoziukunaha. Tsahyrinymyrētsa babatsa tsimaha. Utsa tsimysitsumuēhīkīnaha h̃y. Myhumo ahamypokzitsirētsa tsimaha. Iwaze uta ahape my: — Sinamybyitsa bo ahanamy ty nyny tahaktsa! Utsa kytsa sinamybyitsa bo nyny maha, ikiahatsa hi ahanamy tsizubarēna ty nyny tahaktsa kytsa sinamybyitsa bo! — my.

⁸Ahabo motsasoko kahumo batu ahaty ykzo. Batu kaharere humo ahanamy ty nyny tsimaha. Masedonia ezektsa tsizubarēna ty nyny niaha. — Ikihatsa tihi! — iwa tsimykarana zeka myhumo ahamypokzitsirētsa babatsa tsiwatawykynaha. ⁹Ikihatsa botu mypehaktsa Sesus Kiristu soho bo mytsatyziu tahaktsa! Myhumo tsimypokzitsiarēta hi atakta Deus tuk bijoikpe eze tuze tsinamyrēta h̃y. Iwatatuze mybarawy bo izumuze inamybyita niyzik mypokzihi ninamybyiri. Iwaze hi katsa ihumo mykurētsa tsimoziknaha, sinamyrētsa watsa.

¹⁰Kapehawy ty ahabo my. Jatukta omoro eze ikiahatsa tihi:

— O sinamybyitsa tsyhyryze myokyrysaro tsiperykynahaktsa! — ahatur tsikpamykysokonaha. Taparaka ikiahatsa tsikzihikiknaha iwaze atsatu tsikykarana Sudeja ezektsa tsiksitsumuēhīnaha. ¹¹Iwatsahi tybyizubatahaktsa! Sinamybyitsa tysitsumuēhīzonahaktsa kytsa! Batu mytsaty tsimaha:

— O myokyrysaro ty tsizubarēna mozik zeka iwaze sinamybyitsa tsyhyryze taperyky — iwa ba mytsaty tsimaha. Abaka ahaokyrysaro ty tsimaha ana kino sinamybyitsa bo nyny tsimaha.

¹²Ahakurētsaktsa! Katsaktsa myokyrysaro ty nyny tsimyzihikiknaha zeka ana kino Deus okze wasani my. Myokyrysaro tsikaeni zuba tsimaha zeka iwaze usts bo tsipinynaha zeka ana kino Deus okzeka wasani my. Iwatahi aty nyny myzeka Deus hỹ my. Mybaze byizeka Deus batu mype ziky:

— Utsa bo tsipinyny tsihikiknaha zeka ana kino kaokze wasani — my.

¹³⁻¹⁴Ahanamybyitsa tsimoziknaha zeka batu mozihikik. Abaka ikiahatsa ahanamy tsizubarēna tsikaha asaktsa batu sinamy. Iwatsahi ahanamy sibo tsibiaknaha zeka wasani. Bykzehu tozeka ja ikiahatsa ahanamybyitsa tsimoziknaha iwaze ahabo pibiakaknaha. Iwaze batu aty tohi inamybyita. Batu aty tohi inamyrēta. Ikiahatsa aharape watu tsimoziknaha ahatuk tsipibiakaknaha. ¹⁵Deus harere papau humo iwataha:

— Aty disahawy tsizubarēna zeka ba are ziky.

Aty zeka disahawy jokboha zuba atakta batu irapa — niy. Iwa Deus watahaha nitsaso kytsa soho asahi pibiakaknaha.

Titu iwaze ituktsa ahatsa hawa mykaranaha.

¹⁶Iwaze Titu kawata my. Atahi niwatihi pahatsumuēhī tsihikik iwaze utakta Deus pe:

— O myzo ikia zuba amysapyrēnikita. Ikia humo Titu Korītio ezektsa mysitsumuēhī tsihikik iwatahi kakurēta — mykara. ¹⁷Titu kaharere bo piwabyziuku hawa ha ty ibo nizapykyky ana hi hȳy niy. Atahi:

— Utakta Korītio ezektsa bo mynakozore tsihikik — niy. ¹⁸Ituk hi usta mytuky tapehaka nanabyitaba. Deus wasania ty natsasokoro myzubaha bo. Sesus tuktsa sizubarētsa isoho tihi:

— O ata hi tsiwaby tsihikiknaha — maha. ¹⁹Sesus tuktsa mytukta tu ziwatawynaha, Serusarēhe bo sikukurunahaze mytukta ziwatawynaha. Ahaokyrasaro ty wabehyryk tsimaha ana kino sinamybyitsa bo nyny tsimahaze:

— Katsa ahahumo mypokzitsirētsa — sihyrinymyrētsa. Asaktsa Deus pe niaha:

— O Deus myzo ikia zuba tsamysapyrēta — maha. Ahanamy ty sibo tsipibiakaknaha humo tynamypehapokzitsikinaha iwatsahi Deus bo inapamykysokonaha.

²⁰Okyrasaro tsizubarēna Serusarēhe ezektsa bo wabehyryk tsimaha. Hana wa sinamybyitsa bo okyrasaro ty nyny nyny tsimaha ana hi wasani tsimykaranaha, iwa zeka hawa okyrasaro ty kytsa bo nyny tsimaha pykyhytu tsimaha. ²¹Hawa Deus okzeka wasaniha bo zuba mytsaty tsimyzihihikiknaha. Deus okze ka wasani tsimykaranaha ikiahatsa okze kino niwatihi wasani tsimyzihihikiknaha.

²²Iwatsahi usta Sesus tukta katsy piakzohik. Tapara hawa tsihokdahaarēna nikaraze kytsa nisitsumuēhīkī ana ty hi myhyrinymyrētsa. Ahahumo tispirikporēta iwaze tihi:

— O Korītio ezektsa okyrasaro ty sinamybyitsa bo nyny maha ana humo hi kahyrynymyrēta — mykara. Ahabo mynakozore tsihikik. Iwa hȳy. Kytsa harakykbyitsa ahabo mysiakzoko.

²³Titu katukta pahatsumuēhīkī. Utsa Sesus tuktsa petoktsa ituk mokurunaha. Sesus harere bo hȳy sisopyktsa asahi siwatawyhytsa

niaha. Kiristu bo mosakibazikiknaha. ²⁴Kyze ahabo mozumunahaze tysipokzitsikinahaktsa kytsa! Iwatsahi Sesus tuktsa sizubarētsa Korītio ezektsa soho humo maha:

— O asaktsa kytsa humo mysipokzitsikinaha hỹ — mykaranaha. Iwaze myharere ahasoho wasani my sihyrinymyrētsa.

**Korītio ezektsa siokyrysaro ty Sesus tuktsa
Sudeja ezektsa bo nyny niaha.**

9 ¹Iwaze asaktsa Sudeja ezektsa Deus tuktsa tsimysitsumuēhī tsihikiknaha kahyrinymyrēta iwatahi batu ahabo papeu humo piwataha. ²Utakta botu Masedonia ezektsa pe:

— Sesus tuktsa Keresia ezektsa sinamybyitsa bo mysitsumuēhī tsihikiknaha jatukta niytyktseheze nisitsumuēhī tsihikiknaha — iky. Ana hi ziwabynahaze asahi:

— Katsaktsa niwatihi sinamybyitsa bo tahatsumuēhī tsihikiknaha — niaha. ³Aba uta mytukytsa ahabo mysiakzoko. Ispe iky:

— O Korītio ezektsa botu tahaokyrysaro izikykyknaha. Ana hi mybo nyny mahaze iwaze katsaktsa siokyrysaro tabykyk sinamybyitsa bo nyny tsimaha — iky. Anawahi iktsasoikik. Ahaokyrysaro ty koro ahabyizeka kaharere ba wasani my, iwatahi katukytsa ahabo mysiakzoko, iwaze hawa ahabo botu iktsaso atsatu tsimykaranaha.

⁴Masedonia ezektsa katuk maha zeka ahaokyrysaro ty koro habyzeka ahahumo mysikybyrētsa. Ikiahatsa kino niwatihi ahaokyrysarobyi humo ahasikybyrētsa. Kaharere ahasoho humo siokzeka batu wasani ana humo hi kasikybyrēta. ⁵Iwatahi katukytsa kaharaze mysiakzo. Pahatsumuēhīnaha. Hawa ahaokyrysaro ty koro tsimaha zeka pahatsumuēhīkinaha. Hawa botu tsiktsasonaha anaharere bo yhỹ tsimaha ana kino pahatsumuēhīnaha. Bykyze mozumuze mokymyba iwaze ustsas kytsa tihi:

— O Korītio ezektsa tahaokyrysaro ty nyny niaha. Ba ustsas harere humo nyny niaha. Asaktsa tahaokyrysaro ty pinyny tsihikiknaha hỹ — mykaranaha.

⁶Aty jokboha zuba mysiparik zeka jokboha zuba mysizozik. Aty mysiparik tohi zeka sizubarēna mysizozik. Iwa hawa nyny tsimykaranaha wata atsatu my. Ana bo hi mytsatzyiutahaktsa kytsa! ⁷Aty tapetu isopyk zeka:

— Kaokyrysaro ty ustsas kytsa bo ba nyny ziky — my. Iwa zeka nyny byity. Usta ape my zeka: — Aokyrysaro ty kytsa bo nynyty — my. Iwa zeka nyny byity. Ikiahatsa ahaokyrysaro ty ustsas bo tsipinyny tsihikiknaha zeka iwaze ahaokyrysaro ty nyny ty. Ahakurētsa nyny tsimaha. Iwa nyny tsimykaranaha zeka Deus okzeka wasani tsimykaranaha. Deus ahahumo tsimypokzitsiarēta hỹ. ⁸Deus hi

isapyrēnikia ty ahabo nyny mykara. Deus tanamy ty tsizubarēna ahabo nyny my. Iwaze ikiahatsa hi ustsá kytsa bo ahanamy ty nyny tsimaha. Ahanamyrētsa ikiahatsahi:

— O mynamy ty tabiak tshikiknaha — tsimykaránaha. Iwaze Deus humo ba ziknamybyi tsimaha. ⁹Iwa Deus papeu humo ziwataha:

— Aty tsimysapyrēta tu zeka tanamy ty sinamybyitsa bo nyny mynakara.

Iwaze kytsa isoho “atakta tsimykubiyihurēta” mynakaranaha iwa Deus harere papeu humo ziwatahaka.

¹⁰Deus hi riktá ty mybo nyny my. Riktá jokboha tsimysipariknahaze puētsik zuba tsimysizoknaha. Tsimysipariknahaze sizubarētsa tsimysizoknaha iwa Deus mydisahawy ty mybo nyny mynakara. Nawa Deus isapyrēnikia ty mybo nyny mykara. Anawahi ahanamy ty tsizubarēna ustsá kytsa bo nyny tsimaha. Deus humo tsizubarēna kytsa bo nyny tsimaha! Iwaze ahahyrizikiporētsa tsimoziknaha. ¹¹Deus ahahumo tsimypokzitsiukrēta iwaze ustsá kytsa bo ahanamy ty nyny tsimaha. Iwaze sinamybyitsa Sudeja eze tihi:

— O myzo ikia zuba tsamysapyrēnikita, Koríthio ezektsa sinamy ty mytsyhyryze Pauro tuktsa bo nyny niaha. Iwatsahi sihumo abo tsimysakibazikiknaha — maha. ¹²Sinamybyitsa mysitsumuēhīnahaze sakurētsa moziknaha. Asaktsa Deus bo mosakibazikiknaha. Asahi:

— O myzo ikia zuba amysakihikynikita tsimy — mykaránaha. ¹³Iwa tsimykaránahaze sinamybyitsa Deus pe:

— O myzo ikia zuba wasani tsimykará. Koríthio ezektsa ahumo ka batu sisorek. Asahi Kiristu harere bo hȳ mynakaranaha. Kytsa sizubarētsa mysisapywykynaha mybo kino niwatihi nyny mykaránaha iwatsahi mykurētsa tsimozikzonaha — mykaránaha. ¹⁴Asa hi Deus bo ahatsyhyryze napamykysokonaha, ahahumo simypokzitsirētsa. Asahi:

— O Deus myzo tsimysapywyikik. Koríthio ezektsa batu sisorek mymypokzitsikinaha. Ika sihumo tsimypokzitsiukrēta iwatsahi nymytsumuēhīkīnaha — maha.

¹⁵Niwazuba! Deus myhumo tsimypokzitsiukrēta h̄. Deus tse babata mybarawy bo zipaha. Atahi ipokzitsianikia waha iwatsahi mykurētsa h̄. Katsa hi:

— O Deus myzo ikia zuba amysapyrēnikita — tsimykaránaha. Iwa tahaktsa kytsa!

Pauro Sesus Kiristu humo iakzohota kytsa mysipehaze pibetesaka.

10 ¹Uta Pauro kapehawy ahabo motsasokoro. Deus harere ty pahahyrinymyry, Kiristu wata kakubyrisorokrēta. Atakta kytsa nisihyrinymyry uta iwata pahahyrinymyry batu kasakpare my. Ika hatsa kasoho humo:

— O Pauro nokponi zeka mymybetsakak, ata hi mytuk tu zeka ba zikmybetsak ana pokso tsipybyrēta — tsikaha. ²Iwatahi ahabo pomo zeka ba zahabetsak. Tsipimyikinaha zeka pahabetsak. Asaktsa kasoho tihi:

— O Pauro mybarawy ezektsa harere bo zuba yh̄y nikara, iharere ka Deus harerebara — mybarapetu nikaranaha. Pykyhytuty asa bo pomo zeka mysibetsak. ³Mybarawy eze tu tsimyzurukunahaze mybarawy ezektsa watsa batu kasopyk hawa meky watu mytsaty mykara.

⁴Tsinaharapesukyrykynahaze katsaktsa mybetesawytza mybarawy ezektsa byitsa. Deus hi katsaktsa mybetesawy, mybarawy betesawytzaktsa jokbohatsa tu Deus betesawy ka, aba zuba ba zihokyknaha. Ana hi Satanas zikwy atsoko pihokdawy. Kytsa nahapepehakanahatsa metutu nipaparabaiknaha siharere atsoko pihokdawy. Deus zikwy humo mytuktu mynapykyryk, iwaze siharere atsoko pihokdawy. ⁵Asaktsa nahapepehakanahatsa aba zubatsa nizihikiknaha — mypehawy zuba Deus soho wasani my — mybarapetu mykaranaha. Iwa kytsa mysimiwykynaha, kytsa Deus harere bo h̄y byi mykaranaha. Katsaktsa Deus zikwy mytuk zeka siharere mohokda. Iwaze kytsa sizubarētsa Sesus harere bo hȳy mykaranaha ihumo sispirikporētsa moziknaha. ⁶Aty pimiywyzo zeka sinini my. Ikiyahatsa Deus harere humo hȳy tsimykaranaha ahatuk zeka estuba iharere bo h̄y habyi zeka atahi sinini my.

⁷O kytsa wabyziutaha! Ikiyahatsa mynury bo zuba iktsa ahasopyk. Aty ahape my zeka:

— Uta zuba Kiristu harere bo hȳy mykara Pauro tuktsa ja batu kanyh̄y — my. Isoho bo mytsatyziutaha! Katsaktsa Kiristu harere bo hȳy tsimykaranaha iwata tsimaha. ⁸Iwa tubabatu Deus zikpeha. Pahahyrinymyry naha humo zikpeha. Ana hi botu iktsasoko batu kasikyby. Deus zikwatawy tahi pahatsumuēh̄ikī. Iwaze kapehawy humo ahapunihikrētsa tsimoziknaha, Sesus harere humo ahaspirikporētsa tsimoziknaha iwatahi zikwatawy. Ba zahabetsak. Ba zahasukatsihik ana humo hi batu katy peha. ⁹Ikiyahatsa bo piwatahakaze papeu pokso ahapybyrētsa batu mozihikik. ¹⁰Aty zeka:

— O Pauro mybo zikziwatahakaze ziubaraty papeu humo ziknamybetsakak. Mytuk zeka mekta tu isopyk niy. Atahi:

“O Pauro ipunihikybyita tu iharere ba ziwabynaha. Motsasoikik hawa mybo motsaso wasani ja”. Batu amy tohi mykara tsimaha — niy. ¹¹Atakta ana kino nitsasoko kaharere bo wabyziuty! — Ahabo tsimynakozorenahaze myharere papeu waha my. Hawa botu tsiwatahanaha atsatu motsasoko — my. Iwa h̄y.

¹²Wastuhu kytsa ahatuk:

— O katsaktsa mysapyrēnikitsa — mykaranaha. Katsaktsa siwatsa batu tyso. Ba sihyrinymyry. Simytsatyhybyritsa tu hawa wasani zuba

mykaranaha mytsaty aha byitsa mykaranaha. Deus okzeka batu wasani zikaha. ¹³Tsimytsasokonaha humo pykyhytu — katsa zuba myhyrinyrnyrētsa — batu tyso. — Deus hi botu ahabo nimypeha iwatsahi tsipahayrinyrnyrykynaha iharere bo hỹ tsimykaranaha ana humo zuba tsimytsasokonaha — nawa mysopyk. Batu mybarapetu tsimykaranaha.

¹⁴Katsakta tapara ahabo tsikzumunaha. Deus wasaniha ahabo tsiktsasokonaha. Deus hi:

— O Korítio ezektsa bo taha — niy. Deus nimypehanahatsahi ahabo tsikzumunaha. ¹⁵Bykyze ustsá kytsa ahabo izumunaha. Iwatsahi batu tyso:

— O katsa zuba Korítio ezektsa bo Sesus soho humo tsiksihyrinyrnyrykynaha — iwa ba zikaha. Ikiatsa Sesus harere bo hỹ tsimykaranaha ana zuba tsimyzihikiknaha. Abahi tsipinyrnyrytohinaha iwatuze Deus harere humo zuba hỹ tsimykaranaha, mypehatsa harere bo zuba yhỹ tsimaha. Ana bo mymypeha anabo hi zuba tsimykurunaha. ¹⁶Deus wasania ty ahabo tsimytsasobanahaze nokponi tsimykurunaha. Sasabyitsa bo tsimytsasokonaha nanabyitaba sihudikhudikwy eze tsinakaranaha. Iwatsahi kytsa batu tyso:

— Pauro tuktsa tuk Deus wasaniha kytsa bo motsasokonaha. Kytsa Deus harere botu ziwabynaha, sibo hi motsasokonaha — iwa batu tyso. Anaharere humo hi batu zikaha.

¹⁷Deus harere papeu humo ziwataha:

— Katsakta mysapyrētsa tsimaha zeka. Katsa kytsa pe: “O Deus myzo atahi zuba tsimysapyrēnikita iwata tahaktsa kytsa!” — tsimaha.

¹⁸Katsakta mypetu mysopyk zeka:

— O myokzeka wasani tsimaha — iwa tsimykaranaha zeka batu aty tohi yhỹ mykaranaha. Deus zuba mype zeka:

— O ikiahsa wasani tsimykaranaha — my. Iwaze zuba wasani tsimaha iharere hi tisapyrēna atahi mymybetesaka niy h̃y.

Pauro iwaze siakzohobyitsa simyspihikbatanikitsa tuk mykara.

11 ¹Kyze motsasokoro ityrykmyita wata. Kaharere pykyhytu tsiwabyziunahaktsa! Kahumo ahakubyrisoroku ja. ²Deus ahahumo pahapokzitsiki nahawa tihi. Uta kino niwatihi pahapokzitsiki iwata my. Abaka ahahumo kasukatsihikrēta. Atatsa ityrykduwyhybyitatsa tuze iharerewabyhy zuba iakparawy ustsá mykyryburuktsa batu iakparawy. Atatsa watatsa ikiahsa Kiristu zuba ahakparawy, ikiahsa tihi:

— O Kiristu zuba mykparawy. Ustsakta harerewabyhytsa batu mywabyhy — tsimaha. Iwa mozihikik. ³Ahasoho humo kasukatsihikrēta kytsa ahabo mybarapetu mykaranaha. Siharere tsiwabyziunaha zeka batu imysapy mytsaty tsimykaranaha. Iwatsahi Kiristu harere humo batu

hỹ zikaha siharere humo tsimiyiwkynaha. Satanas Ewa zispihikbataka naha wa asaktsa ahabo mybarapetu mykaranaha. Siharere bo yhỹ tsimykaranaha zeka kasukatsihikrēta. ⁴Aty ahabo mozumuze iharere ezytyk motsasoze ikiahatsa hi:

— O ahawaha batu mynyhy — tsimaha. Tapara Sesus babata soho ahabo tsiktsasotsasokonaha. Asaktsa batu. Sesus babata soho ahabo batu tysoho. Tapara Deus hyrikoso soho ahabo tsiktsasotsasokonaha. Asaktsa batu, Deus hyrikoso babata ahabo batu tysoho. Tapara Deus wasania ty zuba ahabo tsiktsasotsasokonaha. Asaktsa siharere bo zuba yhỹ tsimykaranaha, siharere humo ahakurētsa. Hawa ha ty mektsatu motsasonaha. Deus wasania ty batu tyso. Asa hi ahabo mybarapetu mykaranaha.

⁵Asahi ahabo mybarapetu mykaranahaze sihumo ahaharerewabymybarētsa tsimoziknaha. Deus zikwatawy atahi tazikwy ty kabo nyny niy pahamyiwybyiki iwatsahi kahumo ahamyharerewabyrētsa! ⁶Utakta kaharerehokzaharēta tu hawa ha ty iktsasoko wasani my. Utakta kahyrinymyrēta hỹ iwatsahi kytsa sizubarētsa kaharere humo yhỹ mykaranaha. Tszubarēna ahabo ty iktsasoko ana humo hi ahahyrinymyrētsa.

⁷Ikiahatsa bo ikzumuze Deus wasania ty iktsasoko iwaze ahaokyrysaro ty kabo batu nyny tsikaha. Ahatukze kanamy tsikaeni tsibik zuba iky, iwa humo hi zikzuruku iwatahi Deus isapyrēnikia ty iharere ahabo iktsasoko. Deus wasaniha humo ihuakbara ty ikykara. Hawa wasani ikykara. Ikiahatsa kaharere humo Deus tyryktsa tsikyzyknaha. ⁸Deus wasania ty ahabo iktsasokoze ustsas Sesus tuktsa siokyrysaro ty kabo nyny nikaranaha. Sesus tuktsa ustsas hudikhudikwy ezektsa siokyrysaro ty kabo nyny nikaranaha. Ahatsyhyryze siokyrysaro iakse iwa Deus wasania ty ahabo iktsasoze iwaze ihuakbara ty iktsaso.

⁹Utakta ahatuk zikzuruspykze batu aty tohi okyrysaro humo zikykybyikize batu ahatykda. Sesus tuktsa Masedonia ezektsa kabo izumunahaze tahanamy ty kabo nyny niaha. Ikzihihik naha ty kabo nyny niaha. Ahabo batu ihuak ty ahabo tysapykyk iky ahabo kabokta batu aha. ¹⁰Deus wasania ty Keresia ezektsa bo motsasoko. Iharere baba wasani motsasoko, Kiristu harere kakparawy iwaze batu mybarapetu kasopyk. Kahyriziktsokzawy kytsa Deus wasaniha motsasoko batu pyk kasopyk, ana humo hi ihuakbara ty ikykara. Batu kytsa siokyrysaro ty kabo nyny zikaha. Niwazuba! ¹¹Ikiahatsa hi:

— O Pauro myhumo imypokzitsiubyita tu myokyrysaro ty batu ziake — tsimykaranaha. Niwazuba! Deus hi tsihyrinymyrēta, utakta ahahumo kamypokzitsiarēta ana humo kino tsihyrinymyrēta hỹ.

¹²Asaktsa simysapybyitsa hi:

— O katsaktsa Pauro tuktsa watsa tsimaha — mykaranaha. Batu ba. Utakta Deus harere wasania ty ihuakbara ty motsasoko. Asaktsa batu

mekywatsa tu nikaranaha. Asahi ahaokyrysaro ziaksekenaha iwatsahi batu mywa zikaha. ¹³Asaktsa kytsa Kiristu humo sipe ahabyitsa maha. — Katsaktsa Kiristu ykzohotsa — mykaranahaze mybarapetu mykaranaha:

— O Deus wasaniha tsimytsasokonaha ana kino myhyriziktsokzawy — mykaranaha. Iwa mybarapetu mykaranaha. ¹⁴Utakta kapetu kasopyk:

— Satanans myzihawatahakanahatsa watsa niyziknaha mysispihikbatakanaha. Hawa skaraba Korítio ezektsa siharere bo yhỹ mykaranaha — batu mykara. Nawa batu mytsaty mykara. Satanans hi karipu karipuwu wata niyzik iwaze kytsa bo mybarapetu mykara. Atahi bijoikpe iknykta Deus tsumuẽhĩtsa wata mozik. Hawaha ta sa. Kytsa bo mybarapetu mykara ana humo hi mykara. ¹⁵Iwatsahi sitsumuẽhĩtsa kino niwatihi nisispihikbatakanahatsa:

— Katsaktsa mymysapyrẽtsa — mybarapetu mykaranaha. Iwa kytsa mysispihikbatakanaha. Anasoho humo hi batu mypyby. Deus zuba mokozone hawa isapybara ty sibo nyny my.

Pauro iakzohota Kiristu humo izuhuta nikara.

¹⁶O kytsa ikiahatsa ba kape:

— Pauro ityrykmyita ana bo ka — mytsaty mytsaty byitaha. Ikiahatsa ahaokze ka ityrykmyita mytsaty tsimykaranaha zeka kasoho bo zuba tsipiwabynaha. Sispihikbatakanahatsa watsa — kamysapyrẽta — mykara.

¹⁷Hawa ahabo motsasokoro kaharere ty zuba motsasoko. Deus mozihikik naha humo ahabo batu motsaso hawa mozihikik naha humo zuba ahabo motsasoko, ityrykmyita tawata motsasoko. ¹⁸Utsa kytsa botu ahape mykaranaha:

— O katsaktsa mysapyrẽtsa — niaha. Ana hi nitsasokonahaze sihumo ahamyharerewabyrẽtsa ana hi nizihikiknaha. Siwatsa uta kino niwatihi — Kamysapyrẽta — my. ¹⁹Ahape tu ahasopyk:

— Katsaktsa myhyrinymyrẽtsa hỹ — tsimykaranaha. Ikiahatsa sityrykmyitsa harere ahakparawy. ²⁰Asaktsa pahakyzonahaze sihumo ahakparawy. Pahaspihikbatakanahaze sihumo ahakparawy. Ahadisahawy piaksekenahaze ahakparawy. Sihumo ahanamybyitsa tu tsinakaranaha. Pahakikinahaze sihumo ahakparawy ahaspirikpobyitsa tu tsimykaranaha. ²¹Katsaktsa sisopyk humo mysikpybyrẽtsa tsimykaranaha.

Wastuhu kytsa:

— O mysapyrẽtsa hỹ —. Utakta iwa niwatihi — O kamysapyrẽta my — ityrykmyita wata motsasoko mybarawy ezektsa soho waha natasokonaha. ²²Asa tihi:

— Katsaktsa Ebereutsa — mykaranaha. Uta kino niwatihi Ebereu tihi. — Katsaktsa Isareu ezektsa — mykaranaha. Uta kino niwatihi Isareu ezekta tihi. — Katsaktsa Abarão tsekokatsa — maha. Uta kino

niwatihi Abarão tsekoka tihi my. ²³— Katsaktsa Kiristu tsumuēhītsa — mykaranaha. Uta kino niwatihi, Kiristu harere bo hỹ mynakara ana soho motsasoko zeka katyrykmyita wata my. Kiristu humo tarabaja abazuba ikykara itsumuēhī h̃. Ihumo sakyriukrēnikitsa hurukwy bo kytsa zikoktyhyryknaha. Asaktsa batu sakyriukrēnikitsa hurukwy bo batu isty okty. Kytsa zikikinaha myraratsa hwyk ty tsizerēna ty zikikinaha. Asaktsa batu skiok. Kytsa asiba zikbezenaha zikikinaha. Asaktsa batu isty ba.

²⁴Taparaktsa Sudeutsa zikihikiknaha. Mytsyhyry wa zikikinaha. Kasukpetara baze zikikinaha. Tirīta nowe zikikinaha. ²⁵Homa ezektsa kino niwatihi zikikinaha. Harakykbyi kasukpetara baze hwi ty zikikinaha. Asaktsa siakyriukrēnikitsa harahare ezektsa ty zikarawowokonaha. Zikbeze tsihikiknaha iwa nikaranaha. Harakykbyi buburu zuba buruk ikukuruze tsaraha puētsikbyita niharazuk. Estubaka buburu zuba buruk unata iknatsutsuku okoroze iwa pihik eze ikapykyryk nimyra bo batu zuk.

²⁶Nanabyitaba ziknaukuruze kytsa asiba zikbezenaha. Buburu inapokze. Sitsyhyryboarētsa kanamy ziaaksebaiknaha. Sudeutsa taparaktsa kasukyrytsitsa zikbezekyzykynaha. Sudeutsabyitsa kino niwatihi zikbezekyzykynaha. Sihudikhudikwy burukze kytsa zikbeze kzyzykynaha. Jerukbara bo niwatihi kytsa zikbezekyzykynaha. Buburu zuba bo asiba ikarazuk. Kytsa tihi:

— Katsaktsa aharezeziuwu tsimaha — mybarapetu nikaranaha. Sihumo asiba ikyrikosokda. ²⁷Tarabaja tsizubarēna ikykara. Kahyriziktsokzawy humo batu kaōtutsa. Kadisahawy nepykze kadisahawybyita karapa zikzykyk. Karapukrēta ikykara. Batu kasuku. Kasukbyita iwarik zikzykyk.

²⁸Iwa sinini mynakara. Pibiyituhukutu Sesus tuktsa sizubarētsa soho mytsaty mytsaty mykara. Kapetu kasopyk:

— Kytsa asahi Sesus harere bo hỹ mykaranaha wasani ja mykaranaha — my. Sihumo kamypokzitsiarēta iwatahi mytsaty mytsaty mynakara. ²⁹Aty Sesus harere bo hỹ mykara wasani baraty my zeka uta ituk kasukatsihikrēta. Batu myku tsimaha. Aty Sesus harere bo hỹ mykara imysapybyita mykara zeka uta ituk kasukatsihikrēta. Batu myku tsimaha.

³⁰Kytsa sizubarētsa kasoho humo sihyrinymyrētsa. Kazikwybyita sihyrinymyrētsa. Ana kino motsaso tsihikik. ³¹Deus hi kaharere piwabykyze atahi tsihyrinymyrēta h̃. Ikiatsa bo batu mybarapetu my atahi tsihyrinymyrēta. Deus mymypehaka Sesus Kiristuzo. Katsaktsa ipe tsimaha:

— O Deus ikia zuba koiknybaktatu h̃ amysapyrēnikita — tsimykaranaha.

³²Iwaze Damasko eze tuze sipehatsa Aretas inarokota atakta zikbeze tsihikik. Iwatahi iperytsitsa Damasko hokbowy baze zikuparahakanaha

katsipa humo zikokty tsihikiknaha. ³³Katukytsa ziktsumuēhīnaha. Unata eze zikoktyhyryknaha tsahi tsoromapeza eze tu iziksipikiknaha ape bo niaha. Hokbowy buruk iknasik. Iknawak. Iwaze Damasko ekze ikparakik, iwa ikwakik.

Pauro Deus hudikhudikwy zitsotospykykze ziny.

12 ¹Uta ahabo motsasokoro — kamysapyrēta my — ahape mykara. Anaharere batu imysapy iwatuze motsasoko. Mypehakatsa isapyrēnikia zikwatahawy, hinibytatu zitsotospyk wa ha isapyrēnikia iny, ana soho ahabo motsasoko.

²Tubabatu katorise niytyk tseheze Deus hudikhudikwy bo zikoktyhyryk. Uta zikoktyhyryk ja. Zitsotospykyrykze zuba ja. Batu kanyhy. Deus zuba tsihyrinymyrēta. ³Atsoko tasapy bo zikoktyhyryk tawa ihudikhudikwy bo iktsukze tisapyrēna. Utakta zikoktyhyryk ja. Zitsotospykykze ja. Batu kanyhy. Deus zuba tsihyrinymyrēta. ⁴Anaeze iharere tisapyrēna iwaby. Anaharere ty kino batu tyso. Mybarawy ezektsa bo batu harere my. ⁵Deus hi zikoktyhyryk iwatahi ustsa bo — Kamysapyrēta — my batu tyso. Uta kino kazikwybyita tu kytsa sihyrinymyrētsa ana humo hi motsasokoro. Kapunihikbyita tu ana hi motsasokoro. ⁶Utakta — kamysapyrēta — my zeka wasani my. Batu katyrykmyita. Hawa ha ty wasania ty zuba ahabo motsasoko. Iwaze kaharere ty — kamysapyrēta — batu tyso. Ikiahatsa kasoho humo botu ahahyrinymyrētsa. Hawa zikzuruku naha humo ahahyrinymyrētsa. Hawa motsasoko ana humo kino ahahyrinymyrētsa. Kasoho tyka sosobyi my, hawa sa kasoho mytsaty tsimykaranaha wasani my batu meky watu mytsaty tsimykaranaha.

⁷Deus tahudikhudikwy bo zikoktyhyrykze isapyrēnikia tsizubarēna ikzinyre. Tawata iwaze Deus tapetu isopyk:

— Pauro isapyrēnikia ty ziny. Ana humo hi tozeka ja “aba zubata ja” my — niy. Iwaze Deus ziksininiwyky. Iharere humo Satanas pikmyitsapyriwyky iwatahi kamyitsapyrēta mozik. ⁸Kamyitsapyrize harakykbyihi Deus pe iky:

— O Deus myzo tsikzororowykta! — iky. Deus bo ikzapykykyk. ⁹Iwaze Deus kape niy:

— Ba zazororowy. Kazikwy ty zuba abo nyny mykara. Akubyita tuze kazikwy ty puētsik abo nyny mykara ahumo kamypokzitsiarēta hỹ — niy. Iwatahi kamyitsapyrēta my ana humo hi kakurēta. Utsa kytsa pe:

— Utakta kapunihikrēta — my. Iwa ba ziky. — Kamyitsapyrēta tuze kakurēta. Pibytuhukutu Kiristu zikwy ty kabo nyny mynakara — my.

¹⁰Iwa ustsa kytsa pe mykara:

— Kamyitsapyrēta tuze kakurēta hỹ. Kiristu pokzi kamyitsapyrēta iwatahi kakurēta. Iwaze kytsa kahumo myziakarakanaha,

zikmyijaikiknaha, batu kanamyky, asaktsa Sesus harere bo batu yh̄y nikananaha ziksukyrykynaha iwatahi sinini mykara iwatatu kakurēta. Kazikwybyita tu mypehakatsa zuba tazikwy ty kabo nyny mykara — niy.

Pauro Sesus tuktsa bo paikpa mytsaty nikara.

¹¹Kaharere ityrykmyita wata. Ikiahatsa kahumo tsiharereziubyikinaha iwatahi pikbetesaka. Ahaokzeka utakta amy tohibyita wata. Asaktsa ahabo mybarapetu mykaranaha. Deus pehabyitsa tu mykaranaha sihumo ahakparawy asahi simyspihikbatanikitsa zuba mykaranaha. Ahaokzeka Deus pehakatsababatsa mytsaty ahabyitsa tsimykaranaha. Hawa mykaranaha utakta niwatihi mykara.

¹²Ahatuk ikapykyrykze hawa Deus pehaha mykara atsatu ikykara. Deus zikwy katuk ziknapykyryk ana kino ziwatawy. Amy ty kytsa batu zikaha Deus zikwy humo ikykara. Siwatawyhytsa humo ikiahatsa tsipybyaiknaha. Ahatukze kakubyrisorokrēta ikykara iwa Deus harere humo wasani zahahyrinymyryky ana kino ziwatawykyry. ¹³Deus wasania ty ustsā Sesus tuktsa, asaktsa inazuzuknaha Deus harere bo piwabykynaha, sibo Deus pehatsa nitsasokoronahaze nisisapywykynaha ahatsa watsa bo ikykara. Asaktsa tahanamy ty sibo nyny nikananaha. Ikiahatsa batu. Ahanamy ty kabo batu nyny aha. Iwa ikzihikik. Ana kino batu tyso — O Pauro myhumo batu iakparawy — batu tyso. Aha humo kakparawy.

¹⁴Utakta petok baba ahabo iknakozore. Abaka asiba mokymyky ahabozo. Ikiahatsa ahaokyrysaro ty ba zikzihik. Ikiahatsa zuba Sesus harere bo hȳy tsimykaranaha mozihikik, ahanamy batu mozihikik. Ikiahatsa kahyrytsa watsa. Sizotsa tahahyrytsa okyrysaro humo pikorohyk. Sihyrytsa sinamy ty tahazotsa bo batu nyny zikaha, ana hi sizotsa batu simozihikik. Iwa h̄y. ¹⁵Utakta pahatsumuēhī tsihikik, kanamy ty ahabo nyny my zeka ana hi mozikykuwyky. Kytsa ahatsyhyryze pikbezenaha zeka yh̄y my ahahumo kamypokzitsiarēta h̄y. Ikiahatsa ja. Tsikaeni zuba kahumo ahakparawy.

¹⁶Ikiahatsa kasoho ty tsimypamykysonahaze:

— Pauro mytukze mynamy batu ziaксе iwatsatu myokyrysaro ty ihumo nepyk iwatahi mybo mybarapetu nikara, nimyspihikbataka — tsimaha.

¹⁷Kaharereziuwytša ahabo iksipehahik batu zahaspihikbatakanaha.

¹⁸Kaharereze Titu ahabo zumu. Mytsy itukta niwatihi ahabo zumunaha. Asaktsa ahanamy ty batu tykse. Titu kawata, katsaktsa wasani tsimykaranaha. Katsaktsa ahahumo mysopyk tsimykaranaha h̄y.

¹⁹Ikiahatsa hi:

— O Pauro tuktsa asa tu tahabetesaha tsihikiknaha — tsimaha. Mytsaty ahabyitsa tsimykaranaha Deus okze ka tsimytsasokonaha. Ihumo zuba tsimybetesahakanaha. Kiristu nimywatawy ana humo hi

tsimybetesahawynahaze ahatsyhyryze tsimytsasokonaha. Katsaktsa ahahumo mypokzitsirêtsa, iwatsahi pahatsumuêhĩ tsihikiknaha. Ahapunihikrêtsa tsimoziknaha ana hi tsimyzihikiknaha. ²⁰Ahasoho bo mytsaty ziknakara. Ahabo pomoze ja mekywa tu tsimykaranaha. Iwa ha bo mytsaty mykara. Ikiahatsa kino niwatihi. Kasoho bo mytsaty tsimykaranaha, meky watu sa my. Ahabo pomoze ja tsimyyharape sapybyikinaha ja. Ahazokdiharêtsa ja. Awakytza humo ja tsipahaukanikinaha. Ahabo zuba ja mytsaty tsimynakaranaha. Tsihaharapehudizuikiknaha ja. Ahaharere wabymybarêtsa ja. Ahaharereziubyitsa tu metutu tsimopaparakanaha ja. Batu astsa bo tu mytsaty tsimykaranaha ja. Iwa tsimykaranaha zeka pahabetsak. Pahabetsakwynahaze ahasukatsihikrêtsa tsimoziknaha. Batu ahaku.

²¹Ahasoho bo paikpa mytsaty mynakara. Ahabo mynakozoreze ahahumo kasukatsihikrêta. Kytsa ahatuk zeka simysapybyitsa tu nikaranaha. Utsa okeza bo nisioktyhyryknaha. Wastuhu kytsa makutsa tu mynaharapeokorokonaha. Utsa nisimyibakanaha. Iwa tsikykaranaha zeka ana humo hi batu ahaku. Ahamysapybyitsa tu tsimykaranaha ty moewy byizeka kasikpybyrêta mozik. Deus okze ka ahahumo kasikpybyrêta.

Pauro Sesus tuktsa nisisukpehe.

13 ¹Abaka harakykbyihi ahabo mynakozore. Aba ahabo mynakozorezo. Deus harere papeu humo ziwatahaka:

— Aty zeka usta maku soho motsasoze: “O tohi batu mysapy my” ba hỹ taha. Petoktsa zuba harakykbyihitsa ja mopamykysokonaha iwa kytsa maha zeka: “O tohikta batu mysapy my” iwaze yhỹ tsimaha — niy. Iwa Deus harere papeu humo ziwatahaka.

²Utakta botu petok baba ahabo iknakozore. Asaktsa tahamysapybara ty batu moewy iwatahi iksibetsakak. Iwa mykarazo. Ahabo mynakozorezoze asaktsa tahamysapybara ty moewy ahabyizeka mysibetsakzo, sihumo kasakaniharêta mozik. Utsa kytsa batu tysipeha niwatihi asa humo hi kasakaniharêta. ³Utakta Kiristu harere zuba ahabo motsasokoro. Ana hi tsinymyry tsihikiknaha. Atahi ahatukze tsipunihikrêta niy, atahi zikwy ziwatawy hỹ, ana humo kino ahahyrinymyrêtsa. Utakta simysapybyitsa humo mysibetsakze ikiahatsa hi:

— O anahi Kiristu harere hỹ — tsimykaranaha. ⁴Kiristu mybarawy eze zikzurukuze tazikwy zerekik. Iwaze kytsa zibezenhaze iharapatawyhyta humo zihyrizikiknaha izikwybyita zibezehaha. Deus zihyrizikpowy abaka izikwyrênikita niyzikzo iwa ispituzo my. Katsa ituktsa tsimaha. Katsa kino niwatihi mybarawy ezektsa batu mypunihik. Abaka Kiristu harere bo zuba hỹ tsimykaranahaze Deus hyrikoso mytuk mynapykyryk.

Katsa Korītio bo tsimopomonahaze izikwy humo mypunihikrētsa tsimoziknaha. Ahatsyhyryze izikwy katuk mynapykyryk iwatahi tsipahatsumuēhiekiknaha. Iwa hỹ.

⁵Ikiahatsa hi ahasoho ty mytsatyziutahaktsa! Ahape tu ahasopyk:

— Sesus harere bo ja hȳ tsimykaranaha. Iharere humo ja ahaspirikporētsa. Deus hyrikoso ja mytuk mynapykyryk baba — tsimykaranaha. Iwa ahape tu ahasopyk. Ikiahatsa Sesus Kiristu harere bo hȳ tsimaha zeka iwaze ituktsa tsimoziknaha ana humo kino ahahyrinymyrētsa. Iharere bo hȳ ahabyizeka Kiristu batu ahatuk ziknapykyryk.

⁶Katsaktsa Kiristu humo myspirikporētsa babatsa tsimaha zeka, iharere bo zuba pykyhytu hȳ tsimykaranaha ana humo kino ahahyrinymyrētsa, ana hi tsimyzihikiknaha. ⁷Ahatsyhyryze Deus bo tsimypamykysokonaha. Katsahi:

— O Deus myzo Korītio ezektsa tysitsumuēhikta! Simysapybyitsa nikaranaha anahi pimoewynaha iwa tysitsumuēhikta! — tsimaha. Ikiahatsa wasani tsimyzurukunaha ana hi mozihikik. Utsa kytsa tihi:

— O Pauro tuktsa Korītio ezektsa nisihyrinymyryziukunaha iwatsahi siharere humo simysapyrētsa moziknaha — maha. Ana harere kino ba zikzihikik. Utsa kytsa tihi:

— O Pauro tuktsa Korītio ezektsa nisimyikinaha — maha. Ana harere kino batu waby iky. ⁸Deus harere ba hawa tohi zikzukninaha. Ana harere bo hȳ tsimykaranaha iwaze ustsas kytsa bo tsimysitsumuēhīnaha zikaha, hawa wasani mykara ana ty kino hȳ mykaranaha tsimysitsumuēhīnaha.

⁹Iwaze katsaktsa mypunihikbyize wasani tsimykaranaha. Iwaze ikiahatsa ahapunihikrētsa zeka mykurētsa tsimoziknaha. Iwaze ahatsyhyryze Deus bo tsimypamykysokonaha:

— O Deus myzo Korītio ezektsa tysitsumuēhikta! Azikwy situk mynapykyryk iwatsahi tahamysapybara humo nymyzihikbyrinaha abaka simysapyrētsa babatsa moziknaha awatahaktsa — tsimaha. ¹⁰Aba ahabo piwataha, papeu ty kaharaze pohyryktykta. Iwaze ahabo pomoze ba pahabetsakzo. Ahahumo batu kasakani Deus zikwy katuk mynapykyryk iwaze pahatsumuēhī ana hi mozihikik. Deus hyrikoso bo yh̄ tsimaha ana hi mozihikik. Atahi batu zaha my. Uta kino niwatihi. Ba pahabetsakzo iwatahi papeu ahabo ziskyryk. Hawa taeze ahabo pomo. Iwa hỹ.

¹¹O katukytsa kawatahaha ahabo asiba nepyk. Ahamysapyrētsa tynakaranahaktsa kytsa! Kaharere bo wabyziutaha. Tyharape pokzitsikinahaktsa! Sesus tuktsa atsawatu mytsaty tsimykaranaha. Ikiahatsa tuk yh̄ tsimykaranaha. Iwaze Deus ahahumo tsimypokzitsiarēta, atahi pahahyrinymyryky ihumo ahakurētsa tsimoziknaha. Deus ahatuk tawahi mynapykyryk hỹ.

¹²Tynaharape hapyrykyknahaktsa iwa ustsas pe hawa taharapepokzitsikinaha tsimymywatawynaha. Asaktsa Sesus humo sispirikporētsa katuk hi:

— O Korītio ezektsa humo myhyrizikbarētsa — mykaranaha.

¹³Ahatsyhyryze Deus bo mopamykyso:

— O mypehakatsa Sesus Kiristu Korītio ezektsa tysisapywyky. O Deus myzo sihumo tysipokzitsiukta! O Deus hyrikoso situk tawahi mynapykyrykta! — my. Niwazuba.

Pauro niy